



Buug-yaraha Ardayga & Qoyska

**Dugsiyada Dhexe
2022-2023**

Jadwalka Tasmada

Jadwalka Tasmada	1
Hawlgalka	4
Aaminaadaha Muhiimka ah	4
Diiwaangelinta	5
Waxbarashada	5
Iskaashiga Dugsiga-Qoyska	10
Sharciyada Dugsiga ee Guud	16
Mamnuucidda Takoorka iyo Dhibaateynta	26
Ogaysiinta Xuquuqda hoos timaadda FERPA	27
Waajibaadka Dugsiga-Qoyska ee Sanad Dugsiyeedka 2022-23	28
Heshiiska Adeegsiga Masuuliyadda Leh ee Tiknoolajiyadda	30
Bayaanka Fahanka Buug-yaraha Ardayga & Qoyska	35

Buug-yarahani waxa uu soo koobayaa khayraad, barnaamijyo, adeegyo iyo sharciyo badan oo ay heli karaan ardayda, waalidiinta iyo masuullada STRIVE Prep. Fadlan ogow in buug-yaraha aan loogu talagalay in uu noqdo tuse dhameystiran ee warbixinta la xiriirta dhammaan sharciyada khuseeya ardayda iyo qoysaska STRIVE Prep. Fadlan kala xariir dugsiga cunugaaga warbixinta dugsigaas gaarka u ah. Sharciyada STRIVE Prep way is badeli karaan si waafaqsan go'aan gaadhista STRIVE Prep warbixinada qaarna waxa laga yaabaa in ay isbedeleen intii Buug-yaraha la daabacay. Haddii aad ka qabto wax faallooyin ah ama soo jeedino ah Buug-yaraha, fadlan iimeyl ahaan ugu dir managingdirectors@striveprep.org.

Ardayda iyo Qoysaska STRIVE Prep ee Sharafta Leh,

Ku soo dhawaada sannad dugsiyeed cusub oo xiise leh! Marka aad doorato STRIVE Prep, ilmahaagu waxa uu daahfuri doonaa oo uu yeelan doonaa awoodaha daruuriga u ah guusha kuliyadda iyo wixii ka dambeeya.

Anaga oo la shaqaynayna qoysaskayaga, waxa aanu ku dhiirrigelinayna ardayda inay u fekeraan qaab naqdin leh, u xidhiidhaan si cad oo iskaashi u sameeyaan si furan, gudaha iyo bannaanka fasalka labadaba. Anaga oo ku miisaamayna qaab han leh oo waxbarasho dabbaaldega iyo farxadda, waxa aanu kobcinayna dareenka faduulinimada, halabuurka iyo suuragalnimada ee arday walba.

Ka qaybqaadashadaadu waa qayb muhiim ah oo kamid ah khibradda dugsiyeed ee ardaygaaga anaguna halkan waxa aanu u joognaa inaanu ku hagno oo ku taageerno tallaabo kasta oo waddada kamid ah. Haddii uu ilmahaagu nagu soo biirayo dugsiyeed hoose, dhexe ama sare intaba, STRIVE Prep waa meesha arday waliba uu ku baranayo in uu beddelo caalamka. Aynu bilawno!

Waxa aanu ka shaqaynaa in aanu u oofino laba ballamood qoysaska:

1. Ilmahaagu waxa uu noqon doonaa mid ammaan ah - tani waxa ay ka dhigan tahay in aanu abuurno deegaan diirran, oo daryeel leh halkaas oo macallimiinta iyo shaqaaluhu ay ka shaqeeyaan badqabka waxbarasho, jidheed, bulsheed, iyo dareen ee ilme kasta, maalin kasta.
2. Ilmahaaga waxa loo diyaarin doonaa fursadaha iyo caqabadaha kuliyadda - tani waxa ay ka dhigan tahay in aanu abuurno deegaan waxbarasho kaas oo ballaadhiya fursadaha iyo ikhtiyaarada ardayda ee nololaha ka dambeeya dugsiyeed sare, kuliyadda iyo wixii ka dambeeya.

Buug-yarahani waxa uu khuseeyaa dhammaan toddobada dugsi ee dhexe. STRIVE Prep sidoo kale waxa ay maamushaa laba dugsi oo sare, STRIVE Prep – SMART iyo STRIVE Prep - RISE, kuwaas oo raaca tilmaamaha ku sharraxan Buug-yaraha Ardayga iyo Qoyska ee Dugsiyeed Sare ee STRIVE Prep, iyo hal dugsi oo hoose, STRIVE Prep - Ruby Hill, kaas oo raaca tilmaamaha ku sharraxan Buug-yaraha Ardayga iyo Qoyska ee Dugsiyeed Hoose ee STRIVE Prep – Ruby Hill.

Sharaf bay noo tahay inaanu shaqadan kula qabano, adiga!

Mahadnaq badan,



Chris Gibbons
Aasaasaha iyo CEO ga, STRIVE Prep

Hawlgalka

In lagu la kulmo arday walba halka uu joogo oo lagu garab istaago in uu guulaysto illaa kuliyadda iyo shaqada.

Aaminaadaha Muhiimka ah

Guusha

- Waxa waajib igu ah u dabbaaldeegga guusha waxbarasho iyo ta shakhsiyeed ee dhammaan.
- Waxa waajib igu ah inaan kula xisaabtamo naftayda iyo dadka kaleba filashooyinka sare.
- Waxa waajib igu ah inaan u horseedo xiise iyo farxad shaqadayda.

Caddaalad

- Waxa waajib igu ah inaan si ula kac ah u carqaladeeyo sinnaan la'aanta, eexda, iyo nidaamyada cadaadiska.
- Waxa waajib igu ah abuuritaanka deegaan ammaan u ah jidhka, maskaxda, iyo qalbiga.
- Waxa waajib igu ah dhismaha bulsho taas oo qof waliba uu soo bandhigi karo naftiisa oo dhamaystiran, oo dhab ah.

Dhabar-adayga

- Waxa waajib igu ah aaminaadda ah inaanu ku kobci karno oo maskaxdeenu ku wanaagsanaan karto dedaalka iyo sameynta khaladaadka.
- Waxa waajib igu ah muujinta Con Ganas, halkaas oo aynaan weligeen is dhiibeyn xattaa marka shaqadu adag tahay.
- Waxa waajib igu ah muujinta sharaf iyo samaynta waxa saxda ah xattaa marka waddadu ay adag tahay.

Diiwaangelinta

Iyada oo qayb ka ah diiwaangelinta, waalid/masuul kastaa waxa uu u buuxinayaa Diiwaangelinta Onlaynka ah ee Dugsiyada Dadweynaha ee Denver (DPS) ilmahooga. Tan waxa kamid ah Ogolaanshiyo iyo Fasaxaado Waalid oo cayiman, oo ay kamid yihiin balse aan ku xaddidneyn¹: Safarrada, Warbaahinta, Suuqgeynta Degmada, Adeegsiga Web ka iyo Gudaha ee Sawirrada iyo Muuqaallada, Adeegsiga Internetka, Tiknoolajiyadda Waxbarasheed iyo Qarsoodiniimada Xogta Ardayga, Kaadhka MY Denver Card, Ogaysiiska Sannadlaha ah ee Xuquuqda Waalidiinta/Ardayda, Macluumaadka Hagaha, iyo Ka Bixitaanka Qiimeynada. STRIVE Prep waa dugsi dadweyne oo gaar ah oo ay ogolaatay DPS oo marka aad ka diiwaangeliso ilmahaaga STRIVE Prep waxa aad fahmaysaa oo aad ogolaanaysaa in dhammaan macluumaadka diiwaangelinta iyo ogolaanshiyaha waalidka/masuulka, ogolaanshiyaha iyo fasaxaadaha lagu dhamaystiray Diiwaangelinta Onlaynka ah ee DPS inay gaadhsiisan yihiin STRIVE Prep.

Waxbarashada

Heerarka Waxbarashada

Ka dugsi dhexe oo kuliyaad-u diyaariye ah ahaan, STRIVE Prep waxa ay u haysaa heerar waxbarasho oo sarreeya dhammaan ardayda. Waxa la filayaa in ardaydu ay qaadan doonaan fasallo carin leh, ay qaban doonaan shaqo tayo saraysa, ay wax u baran doonaan oo ay ku bixin doonaan dedaalkooga oo buuxa shaqada fasalka, imtixaanada kookooban, shaqada fasalka, imtixaanada kookooban, imtixaanada, oo ay ka heli doonaan taageero heersare ah shaqaalaha waxdhigista. Iskaashiga iyo xidhiidhka dhex mara ardayda, macallimiinta, iyo waalidiinta ayaa ah daruuri si loo hirgeliyo yoolkan.

Fasallada Waxbarasheed

Ardayda dhammaan dugsiyada dhexe ee STRIVE Prep si guud waxa ay u qaataan fasallo waxbarasheed oo isku mid ah. Arday waliba waxa uu leeyahay fasal Farshaxanka Luuqadda Ingiriisida ah (45-50 daqiiqo maalin walba), fasal Hadalka iyo Doodda ah- qayb kamid ah barnaamijka muhiimka ah ee STRIVE Prep ee fasalka 6aad illaa 8aad-(45- 50 daqiiqo) iyada oo qayb ka ah manhajka ELA, fasal Xisaab ah (90-100 daqiiqo maalin walba), Daraasadaha Caalamka (45-50 daqiiqo maalin walba ama 90-100 daqiiqo maalin dhaaf), Saynis (45-50 daqiiqo maalin walba ama 90-100 daqiiqo maalin dhaaf) iyo Fasallo Gaar ah (fasal gaar ah oo jimicsi iyo/ama Farshaxan) inta lagu gudo jiro sanad walba. Taas waxa dheer, ardaydu waxa ay leeyihiin Achievement Block oo maalinle ah taas oo ku salaysan waxqabadkooga iyo xogtooda waxbarasheed ee gaarka ah. Achievement Block waxyaabaha ay bixiso waxa kamid ah koorso Horumarinta Luuqadda Ingiriisida ah (ELD), caawino waxbarasheed, ama fursado kordhin/hodmin ah.

Dhibcaha

Ka dallad dugsiyo ah oo leh hawlgal u diyaarin kuliyaadeed ahaan, waxa ay masuuliyadi naga saaran tahay hubinta in dhaqanadayada dhibco siintu ay ka taageeraan ardayda inay hirgeliyaan natijada waxbarasho ee ugu wanaagsan. Tani waxa ay u baahan doontaa in dhaqanada iyo sharciyada dhibco siintu ay:

¹ Fadlan la hadal maamulaha ilmahaaga haddii aad jeclaan lahayd inaad nuqul ka hesho xidhmada diiwaangelinta ama aad qabto wax su'aalo ah.

- Ka turjumaan fahanka heerarka ee ardayda iyo awoodda soo saarista natiijooyin muujiya fahankan.
- Siiyaan ardayda fursado badan oo ay ra'yi-celin kaga helaan shaqadooda, ay ku dhaqangeliyaan ra'yi-celintaas oo ay ku wanaajiyaan waxqabadkooga.
- Hubiyaan in ardaydu dhisaan xirfadaha daruuriga ah ee waxbarasho ahaan iyo mawduuc walba gudhiisa labadaba, si ay u soo galaan dugsiga sare iyaga oo diyaar u ah inay ku wanaagsanaadaan isla markaana si fiican u fahansan sida dhibcaha dugsiga sare ay u keenaan aqbalitaanka kuliyadda.

Intaa waxaa dheer:

- Macallimiintu waxa ay u diri doonaan qiimeyno heerarka ku salaysan oo kala duwan, waxa ay si joogto ah u siin doonaan ardayda ra'yi-celin ku saabsan shaqadooda, waxaana ay siin doonaan ardayda fursado badan oo ay ku dhaqangeliyaan ra'yi-celinta kahor inta aanay qiimeyn fahanka kama dambeysta ah.
- Qoysaska waxa si joogto ah loo ogaysiin doonaa dhibcaha ilmahooga. Waalidiinta/masuulladu waxa ay badanaaba ka arki karaan dhibcaha ilmahooga Kadinka Internetka Waalidka ee Xarunta Dugsiga ee aan Dhammaanka Lahayn "Parent Portal of Infinite Campus". STRIVE Prep waxa ay guriga ugu dirtaa horumarka badhtanka nus teeram walba dhammaan ardayda. Dugsiga dhexe, ardaydu waxa ay ku helaan dhibcaha kama dambeysta ah kaadhka warbixinta dhammaadka nus teeram kasta.
- Ardaydu waxa ay helaan kaadhka warbixin nus teeram kasta.
- Si ay u helaan dhibco ka turjumaya fahanka heerarka ee kama dambeysta ah, ardaydu waxa ay awood u leeyihiin inay dib u qaataan qiimeynada heerarka ku salaysan kadib marka ay helaan ra'yi-celinta (qiimeynada cutubyada ee dhammaadka nus teeramku way ka reebban yihiin).
- STRIVE Prep waxa aanu doonaynaa ardaydu inay fursad kasta u helaan inay helaan taageere waxbarasheed oo fasalka ka baxsan oo lagu sar gooyey baahiyaha. Waxa aanu ardayda fursado badan u siinaa inay ka helaan taageere dheeraad ah dhamaystirka shaqada guri iyo fahanka casharka. Fadlan kala xidhiidh maamulaha ilmahaaga wixii ah caawimooyinka iyo taageerooyinka gaarka ah, oo ay kamid yihiin fursadaha taageere ee inta lagu gudo jiro dugsiga iyo dugsiga kadib.

Fasallada 6aad, 7aad, iyo 8aad			
Fasallada Muhiimka ah (ELA, Xisaab, Saynis, iyo Cilmiga Bulshada)	10% Dhammaadka qiimeynada koorsada oo ay kamid yihiin Mashaariicda Waxbarashada ee Mashruuca Ku Salaysan ee	40% Heerarka ku salaysan Qiimeynada Imtixaanada afka, imtixaanada kookooban, mashaariicda, curisyada, qiimeynada qaabeynta, qiimeynada hubinta, warbixinada laabka, Dood Kooxeed Ardayda ah "Socratic Seminar", Tigidhada bixitaanka	40% Caadooyinka Ardayda Laylisyo bixiya fursado tababar isla markaana la jaanqaadaya heerarka. Shaqada guriga Shaqada fasalka Tigidhada bixitaanka

	Daraasaadka Caalamka ee Dugsiga Dhexe		
Fasallada Aan Muhiimka Ahayn (sida, Farshaxanka, ELD, Caafimaadka /PE, SPED, Achievement Block)	50% Qiimeynada ku salaysan Heerarka Imtixaanada, imtixaanada kookooban, mashaariicda, curisyada, qiimeynada qaabeynta, qiimeynada hubinta, warbixinada laabka, Dood Kooxeed Ardayda ah "Socratic Seminar"	40% Caadooyinka Ardayda Laylisyo bixiya fursado tababar isla markaana la jaanqaadaya heerarka. Shaqada guriga Shaqada fasalka Tigidhada bixitaanka	
Dhammaan fasallada	10% Xirfadaha (Qiimeynta) Cadaaladda, Dhabar-adayga, Guusha, Nidaaminta		

Nooca Layliska	Inta Jeer	Celceliska Qiimaha Dhibcaha
Shaqada Fasal/Shaqada Guri (La diro maalin walba, la siiyo dhibcaha 2- 3/toddobaadkii)	2-3/toddobaadkii	5-15 dhibcood/layliskiiba
Warbixinada Laabka/Qoraalka Sayniska (Saynis)	Bil walba	10-30 dhibcood/layliskiiba
Imtixaanada kookooban	1-4/Bishiiba	10-40 dhibcood/layliskiiba
Mashaariicda (sida, maalmaha badan) ee Waaweyn	Nus Teeram Kasta	20-50 dhibcood/layliskiiba
Qiimeynada cutubyada iyo/ama qiimeynada dhammaadka nus teeramka Qiimaynada Waxqabadku waa shayga keliya ee ku jira qaybta buugga heerka sidaas darteed waa ay kala duwan yihiin qiimaha dhibcuhu.	Nus Teeram Kasta	Waa ay kala duwan yihiin <i>Hagid koorso gaar ku ah ayaa jiri karta</i>

Miisaanka Dhibcaha Fasalka

Miisaanka dhibco siinta ee STRIVE Prep waxa uu ku salaysan yahay miisaanka dhibco siinta Dugsiga Dadweynaha Denver waxana uu ku qoran yahay halka hoose.

Fasalka 8aad

Fasalka	Gudbidda	Qiimaha GPA ga
A	X	4
A-	X	3.67
B+	X	3.33
B	X	3
B-	X	2.67
C+	X	2.33
C	X	2
C-	X	1.67
F		0
P	X	
I		0

Fasalada 6aad iyo 7aad

Fasalka	Celceliska
A	90-100%
B	80-89%
C	70-79%
D	65-69%

F	0-64%
---	-------

Koorsooyinka Gudbidda/Dhicitanka

Fasalka	Celceliska
P	65-100%
F	0-64%

Wixii koorsooyinka heerka fasallada isku dhafan ah D du waa ay nagaanaysaa koorsadana waxa lagu dabbiqi doonaa miisaanka dhibco siinta dugsiga dhexe ee caadiga ah.

La Socodka Horumarka Waxbarasheed ee Ardayga

Kadinka Internetka Waalidka "Parent Portal" iyo Kadinta Internetka Ardayga "Student Portal" ayaa ah agab onlayn ah oo loogu talagalay waalidiinta iyo ardaydu inay kaga war hayaan dugsiga oo ay kala socdaan horumarka ardayga. Waalidiinta/masuullada waxa lagu dhiirrigelinayaa inay abuuraan akown Kadinka internetka waalidka "parent portal" ah oo ay si joogto ah ula socdaan horumarka ilmahooga. Si aad u abuurto akown Kadinka Internetka Waalidka "Parent Portal" ah, booqo myportal.dpsk12.org oo guji "Create an Account." Waxa aad u baahan doontaa cinwaan iimeyl iyo lambarka aqoonsiga ardayga ee ilmahaaga. Waalidiintu waxa ay galaangal u heli karaan dhibcaha ugu dambeeya, laylisyada la seegay, iyo macluumaad kale 24 ka saacadood ee maalintii. Si aad u hesho macluumaad dheeraad ah oo ku saabsan galaangal u helidda Kadinka Internetka Waalidka "Parent Portal", fadlan la hadal Maareeyaha Xafiiska ee dugsigaaga.

Kaadhadhka Warbixinta iyo Warbixinada Horumarka

Ardaydu waxa ay helaan khaadh warbixin haaf teeramkiiba, kaas oo ay ku qoran yihiin soo koobid shaqadoodii waxbarasheed ah. Kaadhadhka warbixinta waxa la siiyaa waalidiinta/masuullada habeenka shirka qoyska ee deyrta iyo gu'ga. Haddii waalidka ama masuulku aanu awood u lahayn in uu soo xaadiro habeenka shirka qoyska, isaga ama iyadu waxa uu qabsan doonaa wakhti kale oo uu la kulmo la taliyaha ardayga oo uu u qaato kaadhka warbixinta. Warbixinada horumarka waxa loo soo saaraa dhammaan ardayda badhtamaha nus teeramka. Warbixinada horumarka iyo kaadhadhka warbixinta ee aan lagu qaadan habeenada shirarka waxa loo dirayaa boosta guriga.

Warbixinada horumarka iyo kaadhadhka warbixinta waxa laga heli karaa Kadinta Internetka Waalidka "Parent Portal" myportal.dpsk12.org.

Xayaysiis

Ardaydu waa inay helaan ugu yaraan 65% oo celcelis sanadeed ah koorso walba si ay

u helaan saacadaha waxbarasheed "credit". Haddii arday ka kasbado heer ka hooseeya kan warbixin horumar, ardayga waxa looga baahan karaa in uu ka qaybqaato wax dhigis gaar ah inta lagu gudo jiro saacadaha dugsiga ama caawimaadaha waxbarashada ee dugsiga kadib. Ogsoonow in iyada oo ay jirto in dhibcaha la bixiyo nus teeram walba, haddana dhibcaha sanadka oo dhan ah ee ardaygu helo ayaa ah celceliska dhibcahooga nus teeramka ee ay heleen. Dhibcaha kama dambeysta ah ee arayga ayaa go'aamiya in ardayga ay tahay in loo dallacsiiyo fasalka xiga.

Arday walba oo ku dhaca mid ama wax ka badan maadooyinka ayaa loo tixgeliyaa in uu yahay mid "halis ugu jira ku sii hayn fasal," taas oo ka dhigan in ardaygu ay dhici karto in aanu u qalmin in uu u gudbo fasalka xiga dhammaadka sanadka. Haddii arday uu weli ku dhacayo mid ama wax ka badan maadooyinka oo uu sidaas darteedna yahay mid "halis ugu jira ku sii hayn fasal" dhammaadka sanadka iyo/ama dhammaadka shaqada koorsada xagaaga, masuullada, macallimiinta, iyo waalidiinta/masuullada ayaa kulmi doona si ay uga wada hadlaan in ay tahay in ardayga lagu sii hayo fasalkiisa hadda, iyada oo lagu salaynayo falanqaynta tiro qodobbo ah. Ku sii haynta fasalka loogu ma taliyo ardayda naafada ah. Dhammaadka xaaladaha, go'aaminta ugu dambeysa ee ku saabsan in arday uu "halis ugu jira ku sii hayn fasal" in lagu sii hayn doono fasalka ama la dallacsiin doono waa arrin u taalla maamulaha.

Daacadnimada Waxbarashada

STRIVE Prep waxa ka go'an heerarka iyo filashooyinka ugu sarreeya ee daacadnimada waxbarasheed ee dhammaan ardayda dhexdooda. Waxa aanu aaminsanahay hirgelinta cimilo dugsiyeed oo dardargelisa dhaqan arday oo masuuliyad leh oo ah waxbarashada iyo wixii ka dambeeya. Daacadnimo la'aanta waxbarasheed, oo ay kamid tahay khiyaamada iyo qishku, waxa ay keeni doonaan in loo gudbiyo masuulka si uu wax uga qabto arrimaha aasaasiga ah ee la xidhiidha daacadnimo la'aanta waxbarasheed ardayduna waxa ay masuul ka noqon doonaan buuxinta shaqada. Ardaydu kuma heli doonaan saacado waxbarasheed "credit" shaqada waxbarashada ee aan si sax ah uga turjumeyn fahankooga aqoonta iyo xirfadaha. Go'aanada la xidhiidha bixinta saacadaha waxbarasheed "credit" ee marka lagu jiro duruufahan waxa la gaadhaa iyada oo la raacayo go'aan gaadhista dugsiga. Soo noqnoqoshada xaaladaha daacadnimo la'aanta waxbarasheed waxa ay keeni doontaa shir waalid/masuul iyo cawaaqib kale oo dheeraad ah.

Shaqada guriga

STRIVE Prep waxa ay u dirtaa shaqo guri oo macno leh ardayda habeen walba xiisadaha intooda ugu badan (marka laga reebo fasaxyada iyo inta lagu gudo jiro wakhtiyada qiimeynta). Ujeedka shaqada guri waa in la kordhiyo waxbarashada oo laga caawiyo ardayda inay noqdaan kuwo masuul ah, ku tababarta maareynta wakhtiga, oo barta xirfadaha xallinta dhibaatooyinka ee madaxa bannaan. Macallimiintu waxa ay iyaga oo mustaqbalka ka fekeraya ku dari doonaan fudaydino la waafajiyey IEP ama Qaybta 504 shaqada guriga. Waalidiintu waa inay noqdaan kuwo taageera dedaalada shaqada guri isla markaana si firfircoon u hubiya shaqada guri habeen walba.

Ardayda aan dhamaystirin shaqadooda guri waxa looga baahan karaa inay soo xaadiraan kulanno buuxin shaqo waxbarasho, inta lagu gudo jiro ama kadib dugsiga.

Dhammaan xarumaha STRIVE Prep waxa ay bixiyaan caawimooyin taageero waxbarasho oo shakhsiyeed ama guud, inta lagu gudo jiro iyo kadib saacadaha dugsiga. Fadlan arag maamulaha ilmahaaga si aad uga hesho macluumaad dheeraad ah oo ku saabsan taageerooyinka iyo wax ka qabashooyinka waxbarasheed ee isxilqaanka ah iyo kuwa waajibka ah.

Iskaashiga Dugsiga-Qoyska

STRIVE Prep waxa ay aaminsan tahay in marka dugsiyada iyo qoysasku ay xidhiidh joogto ah leeyihiin oo qaab isku dubo dhacsan ay u wada shaqaynayaan in khibrada dugsiga waxqabadka waxbarashada ee ardaygu ay u faa'iidaan si weyn.

Iskaashiyadani waxa ay ka taageeraan ardaydayada iyo bulshada dugsiga dhammaan dhinacyada - gaar ahaan aagagga waxbarashada, u doodista, adeegga, iyo xidhiidhka. Iskaashiyada xooggan ee ka dhexeeya qoysaska iyo shaqaalaha dugsiga, gaar ahaan macallimiinta, waa qodob muhiim ah oo kamid ah shaqadayada STRIVE Prep.

Xidhiidhka La Taliyeyaasha iyo Waalidka/Masuulka

Dugsiyada dhexe ee STRIVE Prep waxa ay adeegsadaan barnaamij la talin si ay u abuuraan bulsho waxbarasho oo xooggan oo diiradda saaraysa qiyamka STRIVE Prep. Arday walba waxa loo qoondeeyaa la taliye iyo koox arday ah oo la talin. Barnaamijka la talintu waxa uu abuuraa fursad ay ardaydu kula samaystaan xidhiidh la taliyaha, oo ay ku helaan la talin, hagid, iyo taageere muddada sanad dugsiiyeedka. Iyada oo loo marayo kulano la talin, doodo kooxeed, iyo shirar gaar-gaar ah oo maalinle ah, barnaamijka la talintu waxa uu bixiyaa qaab dhismeed muhiim ah oo loogu talagalay qorshaynta waxbarasheed, sahaminta shaqeed, dejinta yoolka, xidhiidhka guriga/dugsiga, dhismaha kooxda iyo bulshada, barashada dareenka bulsheed iyo milicsiga shakhsiyeed.

La taliyuhu waxa uu u shaqeeyaa sida xidhiidhka aasaasiga ah ee qoysaska waxaana uu fudaydiyaa xidhiidhka ka dhexeeya waalidiinta/masuullada, macallimiinta iyo shaqaalaha dugsiga ee kale. La taliyeyaasha waxa laga filayaa inay la xidhiidhaan waalidiinta/masuullada ugu yaraan halmar bil walba, iyaga oo kula xidhiidhaya wicitaan taleefan ama waraaq/iimeyl guriga loo dirayo, si ay warbixin joogto ah uga siiyaan horumarka dugsiga. Xidhiidhada billaha ah waxa ku jiri doona faallooyin ra'yi-celin oo togan iyo kuwo dhisitaan ah oo ku saabsan horumarka waxbarashada iyo habdhaqanka ee ardayga. Waalidiinta/Masuullada waxa loo ogol yahay inay ula xidhiidhaan la taliyeyaasha sabab kasta awgeed, oo ay ka mid yihiin su'aalaha ku saabsan dhacdooyinka dugsiga iyo walaacyada ka iman kara ilmahaaga ama dugsiga guud ahaanba.

Golaha Qoyska

Xarun STRIVE Prep oo kasta waxa ay leedahay Gole Qoys oo kulma bil walba. Iyaga oo kaashanaya maamulaha iyo xubno kamid ah shaqaalaha dugsiga, Golaha Qoysku waxa uu dib u eegaa xogta iyo macluumaadka waxqabadka dugsiga ee ku saabsan barnaamijka waxbarasheed, marka loo baahdana, waxa uu bixiyaa ra'yi-celin iyo talooyin. Golaha Qoysku sidoo kale waxa uu xaddidaa mawduucyada muhiimka ah isaga oo ku salaynaya baahiyaha ardayda ee waxbarasheed iyo kuwa bulsho-dareen iyo bulshada dugsiga ee ballaadhan si ay ula wadaagaan shaqaalaha dugsiga iyo

qoysaska kale. Xubnaha Golaha Qoysku waxa ay ka ciyaaraan kaalin muhiim ah gacan ka geysashada qorshaynta hawlaha, dhismaha qabka dugsiga, iyo la wadaagista macluumaadka muhiimka ah qoysaska kale ee dugsiga oo dhan.

Waxa uu ka kooban yahay shan wakiil Gole Qoys oo kastaa. Saddex xubnood oo golaha qoyska ah waxa doorta ururka waalidka/masuulka, hal macallin waxa doorta hay'adda waxdhigista, hal xubin bulsheed ahna waxa magacaaba maamulaha. Aag walba waxa ku metela Guddiga Wakiilada STRIVE Prep Wakiil Waalid ah. Dhammaan Xubnaha Guddiga waxa ay ku qoran yihiin websaytka STRIVE Prep. Haddii aad jeclaan lahayd macluumaad dheeraad ah oo ku saabsan Golaha Qoyska oo ay kamid yihiin sida aad uga qayb qaadan karto, fadlan la xidhiidh maamulahaaga.

Waajibaadka Dugsiga-Qoyska

Waajibaadka Dugsiga-Qoyska, ee ku jira bogga 28 ee buug-yarahan, waxa uu sheegayaa filashooyinka guud iyo kuwa gaarka ah ee ardayda, macallimiinta, iyo waalidiinta/masuullada. Wadashaqaynteenaa waa iskaashi saddex geesood ah, filashooyinka ugu sarreeyaana waa inay hagaan dhammaan ficilladeena si loo hubiyo waxbarashada ugu tayada saraysa in uu helo ilme kastaaba.

Ilaalinta Carruurta iyo Wargelinta Xadgudubka

Dhammaan shaqaalaha STRIVE Prep waa tebiyeyaal waajib saaran yahay waxaana sharcigu ku waajibinayaa inay sheegaan xadgudubka ama dayaca ilmaha haddii ay si macquul ah u tuhmaan in xadgudub ama dayac uu jiro. Qof kastaaba waxa uu awoodaa in uu soo sheego xadgudubka ama dayaca ilmaha ee uu ka shakiyo isaga oo kala xidhiidhaya Laynka Tooska ah ee Xadgudubka iyo Dayaca Ilmaha ee Colorado 844-264-5437.

Sharciyada Habdhaqanka Ardayda

STRIVE Prep, dugsi waliba waxa uu ka hawlgalaa abuuritaanka dhaqan dugsiyeed oo ku qotoma nidaamyada habdhaqanka togan iyo dhaqanada dhaqan-celinta. STRIVE Prep, mid kamid ah waajibaadka aaminaadahayaga muhiimka ah waxa weeyi, "Waxa waajib igu ah abuuritaanka deegaan ammaan u ah jidhka, maskaxda iyo qalbiga." Waxa aanu aaminsanahay in qof waliba u qalmo in uu qayb ka noqdo bulsho taageero leh halkaas oo qof waliba uu ammaan ku dareemayo in uu usoo bandhigo naftiisa oo dhamaystiran, oo dhab ah dugsiga. Inta aanu qabanayno inta ugu badan shaqadayada si aanu u dhisno bulsho xooggan, sidoo kale waxa aanu leenahay habraacyo loogu talagalay marka ardaygu jabiyo sharci dugsi ama degmo.

Macallimiintu waxa ay ka hawlgeli doonaan sidii ay si togan oo ay mustaqbalka diiradda ku saarayaan ugu taageeri lahaayeen ardaydu inay buuxiyaan filashooyinka fasalka dhexdiisa iyo inta lagu gudo jiro hawlaha dugsiga. Arrimaha u baahan go'aan qaadasho dheeraad ah ee ku saabsan habdhaqanka ardayga waxa samayn doona maamulayaasha dugsiga. STRIVE Prep waxa ay si dhakhso ah u ogaysiin doontaa waalidiinta/masuullada wixii ah tallaabo anshax-marin. Hoos waxa ah faahfaahino la xidhiidha sharcigayaga anshax-marinta ee STRIVE Prep.

Wixii qaybo ah ee xidhiidh la leh IEP ga ardayga ama Qaybta 504 (sida qorshaha wax ka qabashada habdhaqanka, fudaydinada, iwm.) waa la tixgelinayaa marka la

go'aaminayo cawaaqibta habdhaqan ee ardayda naafada ah.

Anshax-marinta Dugsiga

STRIVE Prep waxa ay dhaqan gelisaa Shaxda Habdhaqanka Dugsiyada Dadweynaha Denver taas oo la jaan qaadaysa Sharciga Anshax-marinta DPS; sharciga DPS oo dhamaystiran waxa laga heli karaa [Websaytka Guddiga Waxbarashada ee Dugsiyada Dadweynaha Denver](#), [Sharciga JK-R](#). Dhaqannada anshax-marinta ee dhaqancelinta waxa la adeegsan karaa marka ay habboon tahay. STRIVE Prep waxa ay ka hawlgashaa yareynta wakhtiga ardaydu ku qaadanayaan bannaanka fasalka; si walba ha noqotee, haddii seegitaanka wakhti fasal laga fursan waayo, ardayga waxa looga baahan doonaa in uu soo buuxiyo dhammaan shaqada waxbarasho ee uu seegay muddadaas.

Shaxda Habdhaqanka DPS waxa ku qoran habdhaqanka daruuri ka dhigaya cawaaqib adag, sida ka joojin ku meel gaadh ah oo dugsi iyo eryid. Haddii ka joojin ku meelgaadh ah oo dugsiga ka baxsan loo baahdo, ogaysiis qoraal ah oo rasmi ah ayaa la siin doonaa waalidiinta/masuullada. Ka joojinta ku meelgaadhka ah ee dugsiga ka baxsan waxa ay u dhaxayn kartaa 1 (hal) illaa 3 (saddex) maalmood.

Wixii su'aalo ah ee la xidhiidha Shaxda ama dhaqangelinta Habdhaqanka DPS, fadlan kala xidhiidh maamulaha dugsigaaga. Nuqul ah Shaxdii u dambaysay ee Habdhaqanka DPS ayaa sidoo kale laga heli karaa xafiiska soo dhaweynta.

Shaqaalaha dugsiga ee masuulka ka ah dhaqangelinta sharciyada anshax-marinta dugsiga waa inay sidaas sameeyaan iyaga oo aan sameyn takoor ku salaysan qowmiyadda, jinsiga, asalka wadanka, isirka, diinta, naafanimada, jihada galmeed, ama aqoonsiga jinsiyeed.

Eryid

Ardayga keliya waxa loo eryi karaa sabab habdhaqan oo keliya sida ku qoran Sharciga Anshax-marinta Dugsiyada Dadweynaha Denver (DPS), marka laga yimaaddo sharciyada Magaalada iyo Degmada Denver ama Gobolka Colorado. STRIVE Prep ayaa masuul ka ah u gudbinta arday DPS hannaanka eryidda awgeed marka uu waajibiyo sharciga ama xeerku. Hannaanka eryidda, oo ay kamid yihiin dhegaysiyo, waxa maamula DPS sida ay dhigayaan sharciyada iyo habraacyada DPS ee la dabbago. STRIVE Prep waxa ay qoraal ahaan ku ogaysiin doonaan waalidiinta ama masuullada ardayga haddii la go'aamiyo in ardayga loo gudbiyo eryid inay daruuri tahay ama uu waajibinayo sharcigu. Waalidiinta ama masuulladu waxa ay heli doonaan ogaysiis hore oo qoraal ah oo dhegaysiga eryidda ah. STRIVE Prep ma gaadho go'aanada kama dambeysta ah ee eryidda.

Shaqaalaha dugsiga ee masuulka ka ah dhaqangelinta sharciyada anshax-marinta dugsiga waa inay sidaas sameeyaan iyaga oo aan sameyn takoor ku salaysan qowmiyadda, jinsiga, asalka wadanka, isirka, diinta, naafanimada, jihada galmeed, ama aqoonsiga jinsiyeed.

Wixii su'aalo ah ee la xidhiidha Shaxda ama dhaqangelinta Habdhaqanka DPS, fadlan kala xidhiidh maamulaha dugsigaaga. **Nuqul ah Shaxdii u dambaysay ee Habdhaqanka DPS ayaa sidoo kale laga heli karaa xafiiska soo dhaweynta ee dugsiga.**

Xanibaadda Ardayga

STRIVE Prep waxa ay raacdaa [Sharciiga Xanibaadda Ardayda ee Dugsiyada Dadweynaha Denver](#). Sharcigan waa in la dhaqangeliyo iyada oo la adeegsanayo xukunka xirfadeed ee badka qaba, iyada oo la tixgelinayo ammaanka, badqabka iyo sharafta xubnaha bulshada dugsiga.

Keliya shaqaale la ansixiyey oo tababaran ayaa jidh ahaan u xanibi kara arday. Xanibaadda jidheed waxa keliya loo adeegsan karaa xaaladaha soo socda:

- Si looga ilaaliyo ardayga la xannibay ama kuwa kale halis dhaawac jidheed ah oo khatar ah, suuragal ah, oo dhaw
- Xaaladaha degdegga ah marka tallaabooyinka xannibaadda yar ee kale ay guuldarreysteen ama xubin shaqaale ahi ay go'aansato in tallaabooyinkaasi aanay munaasab ahayn ama aanay wax ka tareyn xaaladahaas

Ficilladaasi ma noqonayaan xadgudub ilmeed loona fasiran maayo inay yihiin ciqaab jidheed iyada oo la raacayo macnaha iyo ujeedka sharcigan.

Xanibaadda kuma jirto:

- Adeegsiga aaladaha ilaalineed ama la qabsi si loo bixiyo taageero jidheed, ka hortagga dhaawac ama habraacyada caafimaad ee isxilqaanka ah ama nolol-badbaadinta ah;
- Haynta ardayga wax kayar 5 daqiiqo si loo ilaaliyo ardayda ama dadka kale;
- Adeegsi wakhti bannaanka ah. Wakhtiga bannaanku waa in ardayga si shakhsi ah loogu geeyo qof weyn iyada oo ujeedku yahay in ardayga loo sahlo in uu ka fekero habdhaqanka aan munaasabka ahayn kahor inta aanu dib ugu soo noqon fasalka ama hawsha dugsiga la xidhiidha ee kale.

Gardareysiga iyo Gardareysiga Internetka

STRIVE Pep waxa ka go'an in ay siiso dhammaan ardayda jawi dugsiiyeed ammaan ah oo sugan. Waxaan aaminsannahay in ardayda awood u yeeshaan in ay wax ku bartaan jawi ka madax banaan handadaad, dhibaateyn iyo nooc kasta oo ka mid ah habdhaqanka gardareysiga, oo uu kamid yahay gardareysiga internetka.

Gardareysiga waa isticmaalka jujuubka ama cabsi gelinta si loo kantaroolo qof kale si loo gaarsiiyo dhibaato xagga jirka, maskaxda ama dareenka qofka ah. Gardareysiga wuxuu ahaan karaa mid qoran, mid afka laga soo jeediyo ama mid loo isticmaalo aaladaha elataroonigga ah, ama fal la xariira jirka ama baaq.

Gardareysiga sabab kasta oo keentaba waa ka mamnuuc dhammaan dugsiyada STRIVE Prep, gudaha dhismaha dugsiga iyo munaasabaha uu kafaalo qaado dugsigu labadaba. Haddii arday uu ka qaybqaato gardareysi, isaga ama iyadu waxa uu wajihi doonaa tallaabo anshax-marin oo la jaanqaadeysa Shaxda Habdhaqanka DPS. STRIVE Prep waxa ay ka taageeri doontaa ardayda iyo shaqaalaha ka hortagga gardareysiga, waxa ay si dhakhso ah u faragelin doontaa dhacdooyinka gardareysiga, waxa ay kala shaqayn doontaa ardayda bedelidda habdhaqanka gardareysiga iyo taageeridda dhibbanayaasha gardareysiga, waxaana ay aqoonsan doontaa oo ay ammaani doontaa habdhaqanka togan ee taageerada leh. Dedaaladan waxa loogu talagalay inay joogteeyaan deegaan ka madhan gardareysi.

Gardarreysigu sidoo kale waxa uu u dhici karaa qaab elegtaroonig ah marka ardaydu aanay joogin xarunta waxbarashada. Haddii ficilladaas gardarreysigu ay carqaladeeyaan deegaanka dugsiga, STRIVE Prep waxa ay qaadi kartaa tallaabo anshax-marin.

Haddii gardarreysi uu dhaco, arday ama waalid/masuul ayey tahay in uu si degdeg ah ugu wargeliyo maamulaha, kaaliyaha maamulaha, masuul, macallin, ama khabiir caafimaadka maskaxda ah. Shaqaalaha ayaa markaas dhacda u baadhi doona qaab dhamaystiran oo qarsoodi ah, illaa inta suuragalka ah, isla markaana dooran doona xalka habboon. Haddii waalid/masuul uu dareemo in xalku aanu ku filneyn, isaga ama iyadu waxa ay iimeyl kula xidhiidhi kartaa managingdirectors@striveprep.org. Aargoosiga ku wajahan shakhsiyaadka ka qaybqaadanaya baadhista looma dulqaadan doono.

Gardarreysiga waxaa lagu tilmaama dhibaateyn oo waxaana dhici karta in ay tahay jebinta xuquuqda rayidka marka ay ku saleysan tahay qowmiyadda, isirka, jinsiga, jihada galmada, aqoonsiga jinsiga, diin, asal dhalasho, abtirsiino, da', xaaladda guurka, xaaladda ciidanka ama naafanimada. Si aad u hesho macluumaad dheeraad ah oo ku saabsan dhibaateynta, fadlan ka eeg halka hoose.

Sidee Baa Qoysasku Caawimo U Geysan Karaan?

Haddii aad ka walaacsan tahay gardarreysi dugsigaaga ah, waxa aanu ku talinaynaa inaad si toos ah ula xidhiidho maamulaha, shaqaalaha bulsheed, cilmi nafsi yaqaanka ama macallinka dugsigaaga si uu wax uga qabto mushkiladda. Waxa aanu kugu dhiirrigelinaynaa inaad ardaygaaga kala hadasho gardarreysiga, iyo inaad barto ilmahaaga in uu badanaaba u sheego qof weyn oo uu ku kalsoon yahay haddii isagu ama iyadu, ama arday kale, uu la kulmay gardarreysi caadi ah ama gardarreysi internet. Wax dheeraad ah kaga baro gardarreysiga caadiga ah iyo gardarreysiga internetka onlayn ahaan khayraadka soo socda: Cyberbullying.org · Stopbullying.gov · Safeschools.state.co.us · Commonsensemedia.org

Safe2Tell

Safe2Tell Colorado waxa loogu talagalay in ardayda ay ka caawiso in si aan haybtiisa la aqoonsan u usoo sheego wixii habdhaqan handadaad leh ah ee ku khatar gelinaya adiga, dugsigaaga, saaxiibadaa, qoyskaaga, ama bulshadaada. Safe2Tell CO waa mid AAN HAYBTAADA LAGU AQOONSANEYN - tani waxa ay ka dhigan tahay aqoonsigaaga ka shakhsiga warka soo tebinaya ahaan waa mid AAN LA AQOON. Safe2Tell keliya waxa uu doonayaa in uu maqlo walaacaaga iskuna dayo in uu caawimo geysto. Qarinta haybta waxa ilaaliya Sharciga Gobolka Colorado. Lambarka bilaashka ahi waa: 1-877-542-7233 (SAFE). Warbixinada sidoo kale waxa lagu sameyn karaa onlayn. Waxa aad ka ogaan kartaa wax badan oo ku saabsan Safe2Tell iyo sida loogu sameeyo warbixinada aan haybta lagu aqoonsaneyn onlayn ahaan barta safe2tell.org.

Hubka

Qoryaha, mindiyaha, waxyaabaha qarxa, ama hubku nooc kasta oo ay yihiin waa ka mamnuuc dugsiga, xarunta waxbarashada, meelkasta oo kamid ah dhismaha, gaadiidka uu kafaalo qaaday dugsigu, ama munaasabad kasta oo dugsigu kafaalo qaaday ama dugsiga la xidhiidha. Hub u eekayaasha, ama wax kasta oo u muuqda inay yihiin hub, oo ay kamid yihiin hubka lagu ciyaaro, ama ay suuragal tahay in hub

ahaan loo adeegsado, marnaba lama ogola.

Xadgudubka

Si loo hubiyo in bulshada STRIVE Prep ay ammaan u tahay dhammaan ardayda, habdhaqanka xadgudubka leh looma dulqaadan doono. Arday walba oo ka geysta ama ku hanjaba in uu ka geysanayo ficil xadgudub jidheed ah dugsiga, gaadiidka uu kafaalo qaaday dugsigu, munaasabad dugsiga la xidhiidha, ama qorsheeya hawshaas xadgudubka ah inta lagu gudo jiro maalin dugsiiyeedka, waxa uu la kulmi doonaa cawaaqib munaasab ku ah sida lagu sheegay Shaxda Habdhaqanka DPS.

Daroogada, Khamriga, iyo Tubaakada

Adeegsiga, haysashada, qaybinta, ama iibinta ardayga ee khamriga, tubaakada, ama daroogada sharci darrada ah, oo ay kamid tahay adeegsiga xashiishada iyada oo aanay jirin qoraal caafimaad oo sax ah oo waafaqsan sharciyada adeegsiga ee habboon, ama si khaldan loo adeegsado daawooyinka la qoro, waa ka mamnuuc dhismayaasha dugsiga, hawlo kasta oo dugsigu ansixiyey, marka ardaydu ay saaran yihiin baabuurta uu dugsigu kafaalo qaaday, ama wakhti kasta ama goob kasta oo dugsigu ku qabsanayo shaqooyinkiisa. Jebinta sharcigani waxa uu keeni doonaa cawaaqib, sida lagu sheegay Shaxda Habdhaqanka DPS.

Baadhitaanada Ardayda

Shaqaalaha STRIVE Prep waxa ay samayn karaan baadhis dhismaha dugsiga ah (oo ay ku jiraan balse aan ku xaddidneyn sanduuqyada ardayda) haddii dugsiga ay ugu jirto maslaxad xooggan, baahi gaar ah ama ay jirto shaki macquul ah oo jabinta xeerka ama sharciga dugsiga ah. Maamullada dugsigu waxa ay sidoo kale waxa ay si shakhsi ah u baadhi karaan ardayga iyo/ama hantida ardayga, aagga miiska, shandadda dhabarka, gaadhiga ku baarkin gareysan dhulka dugsiga, ama hantida dugsiga ee loo qoondeeyey arday gaar ah, markasta oo maamulka dugsigu uu shaki macquul ah ka qabo in shayo loo tixgeliyo inay yihiin sharci darro, kuwo wax rabsha, ama ay jebinayaan xeerka ama sharciga dugsiga, ama shayadaasi loo adeegsado qaab jabiya xeerka ama sharciga dugsiga, uu haysto ardaygu. Saraakiisha dugsigu waxa ay xidhi doonaan arday haddii uu jiro shaki macquul ah oo ah in ardaygu uu haysto daroogo, mukhaadaraad, hub, waxyaabaha qarxa, ama koontarabaan kale oo khatar ah, oo haysashadiisu ay ku keeni karto khatar cad oo degdeg ah ammaanka iyo badqabka ama hantida dugsiga.

Gaadiidka

Gaadiidka keliya waxa la siiyaa ardayda leh naafanimada u qalanta ama kuwa wajahaya guri la'aanta. Haddii aad aaminsan tahay in adiga ama ardaygaagu aad u qalmi kartaan adeegyada gaadiidka fadlan la xidhiidh maamulaha ama shaqaalaha bulsheed/cilmi nafsi-yaqaanka dugsigaaga. Si aad u hesho macluumaad dheeraad ah oo ku saabsan adeegyada ay heli karaan ardayda wajahaya guri la'aanta, fadlan la xidhiidh shaqaalaha busheed/cilmi-nafsi yaqaanka dugsigaaga ama booqo <http://thecommons.dpsk12.org/Page/1147>.

Xaaladaha qaar, adeegyada gaadiidka ayaa laga heli karaa aagag cayiman ama waxa ay heli karaan tigidho bas ardaydu. Fadlan la xidhiidh maamulaha dugsigaada si aad u heshid macluumaad dheeraad ah.

Sharciyada Dugsiga ee Guud

Yoolkayagu waa in aanu hubino arday waliba in uu u xaadiro dugsiga si joogto ah – **Arday Walba. Maalin Walba!** Si aad u guulaysato STRIVE Prep, ardaydu waa inay joogaan. Xaadiritaanka joogtada ahi waxa uu fure u yahay guusha oo dhammaan waxbarashada ku salaysan dugsiga looma diri karo guriga iyaga oo ah shaqo buuxin ah. STRIVE Prep waxa ay aaminsan tahay in ay tahay masuuliyadda waalidka/masuulka iyo ardayga labadaba in ay hubiyaan in ardaygu xaadiro dugsiga maalin walba oo uu u hoggaansamo sharciyada xaadiritaanka dugsiga si uu u helo waxbarasho munaasab ah.

Dhammaan dugsiyada STRIVE Prep waxa ay leeyihiin sharciyo qodobaysan oo cad oo qeexaya hagayaasha iyo filashooyinka xaadiritaanka. Dugsiyadu sidoo kale waxa ay samaysan karaan oo ay dhaqan gelin karaan qorshayaal xaadiritaan oo shakhsiyeed ama dhammaan-dugsiga ah oo waafaqsan sharciga STRIVE Prep iyo sharciga gobolka si loo dhiirrigeliyo xaadiritaanka ardayga ee maalinlaha ah.

Nuqul taariikhaha jadwalka dugsiga ayaa laga heli karaa bogga websaytka ee dugsi walba barta www.striveprep.org.

Nadaafadda Ardayga

Ardayda waxa laga filayaa inay faraxaasaan ama ay adeegsadaan gacmo nadiifiye kadib marka ay adeegsadaan musqusha, kahor iyo kadib cuntooyinka iyo wakhti kasta oo kale inta lagu gudo jiro maalinta sida ay ka dalbanayaan masuullada ama macallimiinta dugsigu. Marka ay suuragal tahay, ardaydu waa inay ku daboolaan qufacooga ama hindhisadooda softi, oo ay ku ridaan softiga weelka qashinka, oo ay ku nadiifiyaan gacmaha saabuun iyo biyo ama gacmo nadiifiye. Ardaydu waa inay ka dheeraadaan ku taabashada indhahooda, sankooda, iyo afkooda gacmaha aan dhaqnayn.

Habraacyada Xaadiritaanka iyo Macluumaadka Guud

Waxa aanu xaqiiqsanahay in maqnaanshiyaha qaar ay yihiin kuwo aan la joojin karin oo ay keeni karaan mashaakil caafimaad ama duruufo kale. Balse, sidoo kale waxa aanu ognahay in marka ardaydu ay ka maqnaadaan dugsiga in badan – iyada oo aan la eegayn sababta – ay ku sababi karto inay waxbarasho ahaan dib u dhacaan. Muhiim ma aha in maqnaanshiyahani ay cudur daar leeyihiin ama inaanay lahayn, dhammaantood waxa ay keenayaan wakhti ka dayacma fasalka iyo dayacaad fursad waxbarasho. Ardaydu waa inay yimaadaan dugsiga maalin walba, marka laga reebo xaaladaha xanuunka darani uu jiro, oo ay ka mid yihiin marka ay xanuunka gudbinayaan, ama duruufaha kale ee lagu sheegay halka hoose inay yihiin maqnaansho "cudur daar leh". Maqnaanshiyaha xanuunka ee wax ka badan laba maalmood waa in lagu xaqiijiyo qoraal uu dhakhtar sameeyo. Wixii maqnaanshiyo ah ee aan cudur daar lahayn waxa ay keeni doonaan xidhiidh waalid/masuul oo degdeg ah.

Ardayda ayaa masuul ka ah inay soo buuxiyaan shaqadii ay ku seegeen maqnaanshiyaha awgii. Haddii maqnaanshuhu yahay mid lasii qorsheeyey, waalidiinta/masuulada iyo ardayda ayaa ay tahay iyaga oo mustaqbalka ka fekeraya inay hore u codsadaan buuxinta shaqada.

Ogaysiiska Maqnaanshiyaha

Waalidka/masuulku waa in uu ogaysiiyo dugsiga ugu dambeyn 9 subaxnimo maalinta maqnaanshiyaha, isaga oo sheegaya sababta iyo goorta ardaygu ku soo noqon doono dugsiga; si walba ha noqotee, waxa aanu ku dhiirrigelinnaa waalidka/masuulada inay ogaysiiyaan dugsiga iyaga oo ku ogaysiinaya ogaysiiska maqnaanshiyaha oo aad qaddin u ah inta suuragalka ah.

Iyada oo ku xidhan duruufka, caddeyn qoraal ah ayaa loo baahan karaa si loogu calaamadiyo maqnaanshiyuhu in uu yahay mid “cudur daar leh.”

Marka lagu soo noqdo dugsiga, arday walba oo maqnaa oo waalidkiisu/masuulkiisu aanay soo wicin dugsiga, isaga ayaa masuul ka ah siinta Maareeyaha Xafiiska ogaysiiska waalidka/masuulka (ama qofka kale ee masuulka ah), taas oo sheegaysa sabab(aha) maqnaanshaha/habsanka (ogaysiiska waa in uu ku jiraa taariikhda iyo macluumaadka kale ee ku qoran halka hoose ee loogu baahan karo maqnaanshaha cayiman).

Fadlan Ogow: Marka arday uu maqnaado, waalidka/masuulka ayaa heli doona wicitaan taleefan oo otomaatig ah maalin kasta oo ardaygu maqan yahay.

Maqnaanshaha Cudurdaarka Leh

Maqnaanshaha cudurdaarka leh waa maqnaanshaha leh ogolaanshaha waalidka/masuulka isla markaana uu ansixiyey maamuluhu midkasta oo kamid ah sababahan awgood:

- Xanuunka ama xaaladda caafimaad ee ardayga;
- Dhimasho ku timid cid kamid ah qoyska dhaw;
- Ballan caafimaad jidheed ama mid maskaxeed (sida, dhakhtar, dhakhtar ilkood, daaweyn),
- Dabbaaldega ciidda diimeed;
- Maqnaanshiyaha ka dhalanaya tallaabooyinka anshax-marinta dugsiga (sida, ka joojinta waxbarashada oo ku meelgaadh ah),
- Waajibka sharciyeed (sida, hortagitaanka maxkamadda, adeegga bulshada);
- Maalinta caafimaadka maskaxda sida ay go'aamiyeen waalidka/ardayga (2 sanadkiiba); ama
- Waajibka ardayga ee aan la joojin karin ee kale (waalidka/masuulku waa in uu kala hadlaa maamulaha si uu u go'aamiyo in maqnaanshuhu noqon doono mid cudur daar leh).

Dugsigu waxa uu uga baahan karaa caddeyn waalidka/masuulka si loo xaqiijiyo maqnaanshiyaha in uu u cudur daaro dugsigu (sida, caddeyn qoraal ah oo ka timaadda waalidka/masuulka iyo/ama bixiyaha daryeelka caafimaadka ama caddeyn ah sababta ardaygu uga maqnaa dugsiga).

Maqnaanshaha Aan Cudurdaarka Lahayn

Maqnaanshaha aan cudurdaarka lahayn waa maqnaanshaha aan buuxin shuruudda maqnaanshaha cudurdaarka leh ama marka waalidka/masuulku ku guuldarreysto in uu keeno caddeynta qoraalka ah ee loogu baahnaa maqnaanshaha cudurdaarka leh.

Tusaalayaasha waxa kamid ah, balse aan ku xaddidneyn, fasaxyada qoyska iyo/ama ardayga, xaaladaha daryeelka ilmaha iyo hawlaha aan xidhiidhka la lahayn dugsiga. Haddii aad hore u og tahay ilmahaagu in uu u baahan doono in uu ka maqnaado dugsiga sabab kasta oo keenta, fadlan la xidhiidh maamulaha ilmahaaga si aad ugala hadasho sida ay u joojin karaan ka maqnaanshaha shaqada dugsiga.

Fadlan ogow: Maamulaha dugsiga ayaa ugu dambeyn go'aaminaya in fasaxu yahay mid cudur daar leh, qoysasku ma go'aaminayaan. Taas waxa dheer, haddii ardaygu wakhti aad u badan ka maqnaado dugsiga, shaqaalaha dugsiga ayaa kala shaqayn doona qoysaska inay xadidaan qorshe xaadiritaan joogto ah.

Goynta

Xaadiritaanka dugsiga waxa uu ku waajibinayaa sharciga gobolku ardayda ah illaa da'da 17. Yoolka sharciga iyo xeerarka xaadiritaanka iyo goynta dugsigu waa in la taageero ardayga iyo qoyska oo la yareeyo caqabadaha hor taagan xaadiritaanka dugsiga.

Ardayda leh afar maqnaanshiyo oo aan cudur daar lahayn bishii ama 10 maqnaanshiyo oo aan cudur daar lahayn sanadkii (aanay ku jirin ka joojinta dugsiga ee ku meelgaadhka ah/eryidda) waxa loo gudbin karaa DPS si looga xareeyo goyn. STRIVE Prep waxa looga baahan yahay in ay gudbiso ardayga si looga xareeyo goyn haddii ardaygu leeyahay wax ka badan (30) maalmood oo maqnaanshiyo aan cudurdaar lahayn ah.

Kahor gudbinta goynta, maamulaha dugsigu waxa uu ogaysiin doonaa waalidka/masuulka maqnaanshaha aan cudurdaarka lahayn waxaana uu ka codsan doonaa kulan waalidka/masuulka si ay uga wada hadlaan maqnaanshiyaha oo ay u abuuraan qorshe xaadiritaan. Xareynta goynta ayaa la tixgelin karaa haddii tallaabooyinka uu qaaday dugsigu ay ku guulaysan waayaan inay si weyn hoos ugu dhigaan ka maqnaashiyaha dugsiga ee ardayga isla markaana wax ka qabashada iyo kormeeridda maxkamaddu ay daruuri u noqdaan inay dugsiga ku caawiyaan yareynta ka maqnaanshiyaha dugsiga ee ardayga.

Haddii aad aaminsan tahay ilmahaagu in uu u baahan yahay qorshe xaadiritaan ama aad jeclaan lahayd macluumaad dheeraad ah oo ku saabsan hannaanka goynta, fadlan la xidhiidh maamulaha ardaygaaga.

Rawaxaadda Xilliga Hore ah

Ardayda u baahda inay xarunta waxbarashada ka tagaan xilli hore waa in uu qaado waalidku/masuulku ama shakhsi ogolaanshiyo loo siiyey (sida uu caddeeyey dugsigu). Shakhsiga ogolaanshaha la siiyey waxa laga dalban doonaa in uu muujiyo aqoonsi waana in uu saxeeexo saaritaanka ardayga isaga oo adeegsanaya diiwaanka xaadiritaanka ardayda kahor ardayga intaan la fasixin. Ardayda waxa ka saari kara fasalka ama dhismaha dugsiga shaqaalaha dugsiga oo keliya.

Xarunta Xidhan

Dugsiyada dhexe ee STRIVE Prep waa xarumo xidhan. Dhammaan ardaydu waa inay

ku sugnaadaan xarunta inta lagu gudo jiro saacadaha dugsiga iyaga oo uu la socdo xubin shaqaale ahi mooyee. Ardayda la fasaxay wakhtiga rawaxaadda isla markaasna aan lahayn waajibaad dugsiiyeed oo kale waxa qaadi kara waalid/masuul, shakhsi ogolaansho haysta, ama si madax bannaan baa ay isaga rawixi karaan haddii ay haystaan ogolaansho qoraal ah oo waalidka/masuulku bixiyey. Ardayda waxa ka saari kara fasalka ama dhismaha dugsiga keliya shaqaale dugsii ardaydana waxa loo fasixi karaa keliya shakhsiyaad ogolaanshiyo haysta (sida ku cad Xarunta Aan Dhammaadka Lahayn "Infinite Campus" ama fasaxaadda kale ee ay hore u bixiyeen waalidka/masuulku). Marka arday laga saarayo dugsiga, shakhsigu waa in uu diyaar u ahaado in uu tuso aqoonsi shaqaalaha dugsiga.

Xaaladaha Degdegga ah ee Qoysaska

Haddii ay dhacdo xaalad degdeg ahi, waalidiinta ama masuulladu waa inay kula xidhiidhaan Xafiiska Maamulaha taleefan ahaan ama waa inay u tagaan si fool ka fool ah. Ammaanka iyo tirinta saxda ah ee dhammaan ardayda awgood, waalidiinta ama masuulladu waa inaanay ardayda ka qaadin dhismaha dugsiga ama aanay la xidhiidhin ardayda ku jirta fasallada iyaga oo aan haysan ogolaanshaha shaqaalaha.

Xaaladda Degdegga ah ee Shilka ama Caafimaad

Haddii xaalad degdeg ah oo caafimaad ama shil halis ahi uu ku dhaco arday jooga dugsiga ama munaasabad dugsii oo ka baxsan xarunta dugsiga, gargaarka degdegga ah ayaa la siin doonaa oo waalidka/masuulka ardaygaas ayaa si degdeg ah loola xidhiidhi doonaa. Haddii waalidka/masuulka aan lala xidhiidhi karin, qof ku qoran foomka caafimaadka ee ardayga (ama kaadhka xidhiidhka xaaladda degdegga ah) ama dhakhtarka qoyska ayaa lala xidhiidhi doonaa. Haddii ay xaaladdu keensato, dugsigu waxa uu wici doonaa Adeegyada Caafimaad ee Xaaladda Degdegga ah (911).

U Maamulidda Daawada Ardayda

Daawada waxa loo maamuli karaa keliya sida uu u qoray dhakhtar ama dhakhtar ilkood iyada oo weliba ay jirto cabiraad ogolaanshiyo oo qoraal ah oo laga helo waalidiinta/masuullada. **Foomka ogolaanshiyaha daawada waa in ay buuxiyaan oo ay saxeexaan waalidiinta/masuullada iyo dhakhtarku.** Daawada waa in lagu siiyo dugsiga bogoska farmasiiga ee asalka ah iyo calaamadda sheegaysa magaca ilmaha, magaca daawada, xaddiga daawada laga qaadanayo, inta jeer/maalintii, habka, iyo taariikhda ay tahay in daawada la joojiyo (haddii ay ku habboon tahay). Caddeyn dheeraad ah ayaa maamulidda daawada loogu baahan karaa munaasabadaha dugsiga ee la qabto saacadaha aan kuwa dugsiga ahayn.

Xidhitaanada/Dib U Dhigista/Rawaxaadaha Hore ee Dugsiga

Haddii ay cimilo xuni jirto, STRIVE Prep waxa ay raaci doontaa go'aanka Dugsiyada Dadweynaha Denver si ay u xidho dugsiga ama ay dib ugu dhigto bilawga dugsiga. Xidhitaanada iyo dib u dhigista dugsiga ee Dugsiyada Dadweynaha ee Denver waxa laga ogaysiinayaa dhammaan xarumaha raadiyaha iyo telefiishanka ee Metro Denver waxana la soo dhigayaa websaytkooga, www.dpsk12.org. Marka ay suuragal tahay, STRIVE Prep waxa ay sidoo kale isku dayi doontaa inay gaadhsiiso macluumaadkan qoysaska wakhti aan ka dambeyn 5:30 subaxnimo iyada oo u marinaysa qaabab kala duwan oo ay kamid yihiin - wicitaanada otomaatiga ah iyo farriimaha qoraalka ah iyo sidoo kale ogaysiisyo la soo dhigayo websaytkayaga www.striveprep.org iyo bogagga Facebook ga ee gaarka u ah dugsiga. Waa masuuliyadda waalidiinta/masuulada iyo ardayda inay galaan macluumaadkan.

Munaasabado naadir ah, xaaladaha xarunta dugsiga ama qodobada kale ee aan la joojin karin, ee dibadeed waxa ay u baahan karaan fasaxaad ama xidhiitan dugsi oo hore oo xaalad degdega ah. STRIVE Prep waxa ay ogaysiin doontaa waalidiinta/masuullada duruufahan iyo wixii tilmaamo ah ee la xidhiidha ee khuseeya isbeddelada rawaxaadda ama jadwalka iyaga oo u marin doona fariin taleefan oo la duubay ama qoraal, oo ay dheer yihiin ogaysiisyada laga sameeyo websaytka STRIVE Prep, iyo bogagga baraha bulshada ee rasmiga ah ee STRIVE Prep.

Socdaallada bannaanka, Safarada, iyo Fursadaha Waxbarashada ee Bannaanka

Socdaallada bannaanka, safarada, iyo fursadaha waxbarashada ee bannaanku waxa ay qayb ka yihiin waxbarashada ee ardayga ee STRIVE Prep waxaana ay u banbixiyaan ardayda fursado waxbarasho oo badan oo aan ka jirin fasalka dhexdiisa. Waalidiinta iyo masuulladu waxa ay fahansan yihiin in ka qaybqaadashada socdaal waxbarasho oo kasta ama fursad waxbarasho oo bannaanka ahi ay u banbixinayso ilmahooga khataro, oo ay kamid yihiin shilalka, dhaawacyada, waayitaanka ama waxyeellada waxaana ay fahansan yihiin in STRIVE Prep aanay masuul ka ahayn khatarahaas oo kale. Waraaqaha ogolaanshaha socdaalka bannaanka ayaa loo diri doonaa guriga kahor socdaal bannaan oo kasta oo ardayguna ka qaybqaadan maayo socdaalka bannaanka illaa waraaqda ogolaanshaha oo saxeexan uu soo celiyo. Waalidiinta/masuullada qaba su'aalaha ku saabsan sharciyada socdaalka bannaanka waa inay la hadlaan maamulaha dugsiga, su'aalaha ku saabsan socdaal bannaan oo gaar ah waxa lagu hagaajin doonaa xubinta macallinka/shaqaalaha ah ee hoggaaminaysa socdaalka bannaanka ee gaarka ah.

Adeegga Cuntada

STRIVE Prep waxa ay siisaa quraac iyo qado ardaydeeda. Dugsigu waxa uu ka qaybqaataa Barnaamijka Qadada Dugsiga ee Qaranka, kaas oo siiya quraac bilaash ah dhammaan ardayda u qalma qadooyin bilaash ah ama qiimahooda la dhimayna in la siiyo. Codsiyada ka qaybqaadashada barnaamijka waxa laga heli karaa diiwaangelinta, hagitaanka, iyo Xafiiska Maamulaha. Qoysaska ayaa dhaqaale ahaan masuul ka ah kharashka qadada sida uu go'aamiyey Barnaamijka Qadada Dugsiga ee Qaranka. Ardayda aan u qalmin barnaamijka qadada bilaashka ah ama qiimaheeda la dhimay isla markaana aan u soo qaadan lacag qado ama qado dugsiga waxa qado siin kara masuullada dugsiga. Wixii kharash ah ee ka yimaadda waa in si dhakhso ah dib loogu bixiyo xafiiska maamulaha adiga oo kaashanaya Maareeyahaaga Xafiiska. Akownada ardaydu waxa ay noqon karaan kuwo taban ganaax la'aan; si walba ha noqotee, qoysaska ayaa masuul ka ah inay dib lacagta ugu celiyaan STRIVE Prep sida ugu dhakhsaha badan ee suuragalka ah.

Xasaasiyada Ardayga

Waalidiinta/masuullada ayaa masuul ka ah ogaysiinta kalkaalisada iyo maamulaha dugsiga haddii ilmahoogu uu leeyahay xasaasiyado ama xaddidaado cunto. Marka la ogaysiiyo, dugsigu waxa uu kaala shaqayn doonaa diyaarinta baahiyaha ilmahaaga iyo hubinta ammaankiisa. Cadeyn caafimaad ayaa daruuri noqon karta qoysaska ayaana masuul ka ah bixinta wixii daawo xaalad degdeg ah ee daruuri ah ee ilmahoogu u baahan karo (sida EpiPen). Kalkaalisada dugsiga, maamulaha iyo waalidiinta/masuullada ayaa ka wada shaqayn doona samaynta qorshe loogu talagalay xaaladda degdegga ah ee xasaasiyadda. (sida maamulidda EpiPen, haddii ay habboon tahay oo lala soo gudbiyey foomka daawada).

Waalidiinta/masuullada ayaa masuul ka ah wargelinta dugsiga haddii ay wax isbeddelo ahi ku yimaaddaan xasaasiyadda ama baahiyaha daawo ee ilmahaaga.

Kharashka Ardayda

Si aad u hesho macluumaad kharashka ardayda ah oo gaar ah, oo ay kamid yihiin liis dhamaystiran oo kharashka ardayda ah iyo sida loo codsanayo tanaasul, fadlan ka eeg websaytka STRIVE Prep ama ka dalbo maareeyaha xafiiska ee xarunta dugsiga ilmahaaga nuqul ah sharciga fiiga ardayda ee hadda.

Fiiga Tiknoolajiyadda Ardaygaaga

Si ay u xaqiijiso in dhammaan koombuyuutarrada ay heli karaan ardaydu, STRIVE Prep waxa ay ka qaaddaa kharash ah \$25 dhammaan ardayda dugsiga dhexe iyo sare, iyada oo wax ku darsiga qoysku yahay ugu badnaan \$50 qoyskiiba. Kharashkan waxa ku jira khaarashka hal mar oo dayactir ah sanad dugsiiyeedkiiba. Kadib hal dayactir, qoyska ayaa masuul ka ah dhammaan kharashyada dayactirka ee xiga. Fiiga tiknoolajiyadda wakhtigoodu waa bilawga sanad dugsiiyeedka maalinta diiwaangelinta, ama kahor maalinta ugu horaysa dugsiga ee ardayga ee ardayda isdiiwaangeliya sanadka dhexdiisa. Waxa lagu bixin karaa kaash, jeeg, ama kaadhka deynta. Haddii aanad awood u lahayn inaad bixiso kharashka tiknoolajiyadda ama aad qabto su'aalo dheeraad ah, fadlan la xidhiidh Xafiiska Maamulaha ee dugsiga ilmahaaga. Waxa aanu kaa dalbanaynaa taageerada bixinta kharashka tiknoolajiyadda ee ilmahaaga si aanu u siino ilmahaaga dhammaan faa'iidooyinka deegaan waxbarasho oo xooggan.

Jimicsiga STRIVE Prep

U Qalmitaanka Ciyaaraha

- Dugsiyada dhexe ee STRIVE Prep waxa ay raacaan hagayaasha u qalmitaanka ee Ururka Hawlaha Dugsiyada Sare ee Colorado. Dugsi dhexe oo kasta waxa uu leeyahay qorshe u qalmitaan oo si gaar ah loogu talagalay dugsiyiisa iyada oo lagu saleeyey hagayaashiisa oo waafaqsan wixii barnaamijyo ah ee shuraako la ah. Qorshaha u qalmitaanka waalidiinta/masuullada iyo ardayda waxa kala hadli doona masuulka jimicsiga xarunta dugsiga, iyo kooxda maamulka kahor xilli ciyaareed kasta.
- Liiska u qalmitaanka waxa ururiya toddobaad walba Masuulka Jimicsiga.

Baadhitaanada Jidheed

Kahor ka qaybqaadashada wax jimicsiyo ah oo tartaneed, dhammaan ardayda waa in uu siiyaa baadhish jidheed dhakhtar khibrad leh oo ay helaan ogolaanshiyo si ay uga qaybqaataan jimicsiyada, tababarada, iyo tartanka la xidhiidha hawlaha jimicsi. Waxa lagu talinayaa in qoysasku ay qabsadaan ballanta badhista caafimaad ee jidheed xagaaga si ardaydu ay u helaan baadhish caafimaad jidheed oo shaqaynaysa sanad dugsiiyeedka oo dhan. STRIVE Prep waxa ay xaq u leedahay inay ka dalbato ardayda inay keenaan dib u xaqiijin ah baadhista caafimaadka jidheed. Xattaa haddii arday ka qaybqaatay Jimicsiyada STRIVE Prep sanad dugsiiyeedadii hore, baadhish jidheed oo cusub ayaa loo baahan yahay.

Adeegsiga Tiknoolajiyadda iyo Baraha Bulshada

Wakhtiga diiwaangelinta dhammaan ardayda STRIVE Prep waxa la siiyaa *Heshiiska Ogolaanshaha iyo Adeegsiga Tiknoolajiyadda*. Adeegsiga tiknoolajiyadda ama adeegyada internetka ee STRIVE Prep lama ogola illaa ardayda iyo

waalidiinta/masuulladu ay saxeexaan heshiiska. Dhammaan xeerarka STRIVE Prep iyo sharciyada habdhaqanku waa ay khuseeyaan adeegsiga aaladaha iyo internet ka dugsigu bixiyo, oo ay ka mid yihiin balse aan ku xadidneyn, gardarreysiga, takoorka iyo dhibaataynta iyo sharciyada habdhaqanka ee STRIVE Prep. Ardayda iyo qoysasku waa ay fahansan yihiin in adeegsiga ardayga ee aaladaha ama internetka ay bixiso STRIVE Prep la kormeeri karo oo ayna jiri doonin wax filasho ah oo qarsoodinimo oo ah xidhiidhada la isku dhaafsado adeegsigaas. Tani waa soo koobidda heshiiska iyo sharciga, oo waalidiinta/masuullada iyo ardaydu waxa ay ka heli karaan nuqul dhamaystiran Xafiiska Maamulaha ama waxa ay ka tixraaci karaan agabkooga diiwaangelinta.

Buugaagta

Ardayda waxa la siin karaa buug daabacan iyo sheeko faneedyo fasal oo dugsi leeyahay waana inay ku ilaaliyaan buugtaas xaalad wanaagsan sanadka oo dhan. Buugaagta waxyeellooba ama luma waxa masuul ka noqon doona waalidka/masuulka waxaana ka dhalan kara kharashka waxbarasho.

Adeegsiga Taleefanka/Taleefanada Gacanta ee Ardayga

Taleefanka gacanta lama ogola maalinta waxbarasho. Ardayda iyo waalidiinta/masuuladu waxa ay fahansan yihiin in arday kasta oo u soo qaata taleefan gacan dugsiga uu masuuliyaddiisa isagu leeyahay. Ardayda waxa laga dalban doonaa inay damiyaan taleefanadooda gacanta oo ay ku ridaan sanduuqa qufulan ee fasalka bilawda maalin walba. Haddii arday ku guuldarreysto in uu wareejiyo taleefankiisa gacanta oo uu soo dhaco ama la arko, xubin shaqaale ah ayaa la wareegi doona taleefanka oo ku celin doona keliya waalidka ama masuulka.

Marka loo baahdo, iyo xaaladaha degdegga ah, ardaydu waxa ay galaangal u heli doonaan taleefanka dugsiga si ay ula xidhiidhaan waalidiintooda/masuulladooda. Haddii arday u baahdo in uu la xidhiidho waalid/masuul, ardayga waxa laga filayaa in uu ogolaansho ka dalbado shaqaalaha si uu u adeegsado taleefanka dugsiga.

Fadlan ogow: Shaqaalaha STRIVE Prep ma qaadayaan wax masuuliyad ah oo ah xatooyada, lumidda, ama waxyeelloobidda taleefanka gacanta. Ardayda iyo waalidiinta/masuullada ayaa qaadaya dhammaan masuuliyadda taleefanadda gacanta ee ardaygu u soo qaato dugsiga.

Hantida Shakhsiyeed

Ardaydu waxa ay galaangal u helayaan sanduuqyo loo qoondeeyey waana inay ku ritaan dhammaan agabka shakhsiyeed ee aan loo baahneyn inta lagu gudo jiro maalin dugsiyeedka sanduuqooga. Dhammaan hantida la keeno dugsiga waxa masuuliyaddeeda iska leh mulkiilaha. STRIVE Prep masuul kama aha wixii hanti ah ee ay iska leeyihiin ardaydu. Walxaha ardayga mashquuliya ama aan munaasabka ahayn waa laga qaadi doonaa ardayga waxaana la celin doonaa dhammaadka maalinta, inta badan iyada oo laga dalbanayo waalidka/masuulka in uu yimaado si uu u ceshado shayga (kuwaas oo ay kamid yihiin taleefanada gacanta iyo aaladaha elegtarooniga ah ee aan la ogolaan sida sameecadaha dhagaha aan xadhiga lahayn). Xadgudubyada soo noqnoqda waxa ay keensan doonaan shir waalid/masuul. Ardaydu waa inaanay u soo qaadan lacag aad u badan dugsiga.

Wixii Lumay iyo La helay

Dugsi waliba waxa uu leeyahay sanduuq loogu talagalay waxyaabaha luma ee la helo. Fadlan la xidhiidh maareeyaha xafiiska ee dugsigaaga si aad u heshid macluumaad dheeraad ah. Agabka aanay cidi sheegan muddo bil ah gudaheed waxa loogu tabaruci doonaa hay'ad khayri ah iyada oo la raacayo go'aan gaadhista STRIVE Prep.

Agabka Dugsiga

Waa masuuliyadda ardayda inay la yimaaddaan agab habboon dugsiga. Haddii waalidiintu ay caawimo uga baahan yihiin hubinta in ilmahoogu uu haysto agabka dugsiga ee habboon, waalidiinta/masuulladu waa inay la hadlaan lataliyaha ilmahooga, la taliyaha dugsiga ama maamulaha.

Tallaalka Ardayda

Sida uu dhigayo sharciga Dugsiyada Dadweynaha Denver, ardayna looma ogolaanayo in uu soo xaadiro ama uu sii wado in uu soo xaadiro dugsi ku yaalla degmadan isaga oo aan buuxin shuruudaha tallaalka ka dhanka ah cudurka isaga oo ardaygu leh dhaafid sax ah oo caafimaad, diineed, shakhsiyeed ama sababo kale awgood mooyee sida ku xusan sharciga.

Ogolaanshaha iyo Fasixidda Warbaahinta ee Ardayga

STRIVE Prep waxa ay jeceshahay inay u dabbaaldegto oo ay muujiso guulaha ardaydayada iyo shaqaalahayaga, oo aanu gaadhsiino hawlaha STRIVE Prep bulshadayada. Tusaale ahaan, ardayda ama shaqada ardayga waxa lagu dari karaa agab lagu tababarayo macallimiinta oo/ama lagu kordhinayo wacyigelinta dadweynaha ee dugsigayaga iyada oo la adeegsanayo joornaalo, raadiye, TV, websaytka, bandhigitaano, buug-yareyaal, waraaqo wareed iyo noocyo kale oo warbaahin ah. Inta lagu gudo jiro diiwaangelinta ama kahor maalinta ugu horaysa ee dugsiga, waalidiinta/masuullada waxa la siin doonaa foom Ogolaansho iyo Fasixid Warbaahin ah. Haddii aad qabto wax ku su'aalo, fadlan la xidhiidh maamulaha dugsigaaga.

Baahinta Agabka ama Dhukumentiyada La Daabacay

Daabacaadaha uu diyaariyey loona diyaariyey dugsiga waxa loo soo bandhigi karaa ama lagu baahin karaa bulshada ballaadhan, iyada oo la haysto ogolaanshiyo hore oo uu sameeyo maamulaha, la taliyaha, ama macallin. Agabyadaas waxa kamid noqon kara dhejisyo dugsiyeed, buug-yareyaal, sawirrada gidaarrada, iwm. Dhammaan daabacaadaha dugsiyada waxa kormeeraya macallin, kafaale qaade, iyo maamulaha.

Iyada oo arday ka helo ogolaansho hore oo gaar ah maamulaha mooyee, agabka qoran, sawirada kamaradda, sawir gacmeedyada, codsiyada, filimada, cajaladaha, dhejisyada, ama agabka kale ee muuqaalka ah ama dhegaysiga ah lama soo bandhigi karo, iibin karo, wareejin karo, ama baahin karo dugsiga ama xarunta dugsiga. Agabka lasoo bandhigo ogolaanshiyahan la'aantii meesha ayaa laga saari doonaa.

Ganacsiga

Ardaydu waxba kuma iibin karaan dhismaha dugsiga iyaga oo aan ogolaansho ka haysan maamulaha. Lacag ama agab uma urursan karaan ujeedooyinkooga gaarka ah ama urur kaas oo ay ku leeyihiin meel ka baxsan dugsiga iyaga oo aan ogolaansho hore ka haysan maamulaha.

Agabka iyo Hantida Fekereed ee Xuquuqdoodu Dhawran Tahay

Ardaydu waa inay u hoggaansamaan xukunada sharciga xuquuqda dhawrsan iyo sharciyada hantida fekereed. STRIVE Prep waxa ay mamnuucaysaa daabacaadda sharci darrada ah nooc kasta oo ay tahay. Agabka xuquuqda dhawrsan, ha noqdaan kuwo daabacan ama kuwo aan daabacneyn; kuwo onlayn ahaan lagu daabacay; ama ah qaab softiweer, muusig, dhexdhexaadiye dhijitaal ah ama bandhigid nuqul laga ma sameyn karo ama lama soo bandhigi karo iyada oo adeegsigaas uu ogol yahay sharcigu ama iyada oo ogolaansho qoraal ah laga helo mulkiilaha xuquuqda dhawrsan mooyee. Ardayda iyo waalidiinta/masuullada waxa waajib ku ah inay weydiyaan maamulaha dugsigooga haddii ay qabaan wax su'aalo ah oo ku saabsan ku adeegsiga agabkaas shaqadooda dugsiiyeed.

Lahaanshaha, iyo dhammaan xuquuqda, xaqa sheegashada, iyo daneynta, dhammaan hantida fekereed, oo ay ka mid yihiin balse aan ku xaddidneyn hantida fekereed ee ah qaabka xuquuqda dhawrsan, xuquuqda ikhtiraaca ama nooc kasta oo kale oo hantida fekereed ah, oo ay abuureen ardaydu intii ay ku gudo jireen iyo muddadii ay ka diiwaangashanaayeen STRIVE Prep ama ay aadka u adeegsanayeen khayraadka STRIVE Prep (oo ay kamid yihiin balse aan ku xaddidneyn qalabka, agabka, xarumaha ama macluumaadka aaladda ama farsamadda sirta ah, ee qarsoodiga ah) waa hanti ka dhaxaysa ardayga iyo STRIVE Prep. Ardayda iyo waalidiintooda/masuulladoodu waxa ay u qoondaynayaan wadaag lahaansho, iyo dhammaan xuquuqda iyo faa'iidooyinka wadaaga lahaanshahaas, STRIVE Prep. STRIVE Prep waxa ay u rukhsayn kartaa agabka ardayda hay'ado ka baxsan dugsiga ama waxa ay u adeegsan kartaa agabka ay abuureen ardaydu daabacaadaha, ururinta tabarucaadka ama sababo kale. Illaa inta suuragalka ah, STRIVE Prep waxa ay ogaysiin doontaa waalidiinta/masuullada iyo ardayda kahor wixii ah daabacaad ama adeegsi ka baxsan dugsiga oo shaqooyinka ardayda ah.

Codsiga Xallinta Cabashada aan Rasmiga ahayn iyo ta Rasmiga ah

Maamulka dugsiga iyo Guddiga Wakiillada STRIVE Prep waxa ay ka wada shaqeeyaan dhegaysiga iyo xallinta cabashoyinka ka yimaadda waalidiinta/masuullada ama xubnaha bulshada.

Haddii ay dhacdo cabasho la xidhiidha habdhaqan arday ama sharciyada dugsiga, STRIVE Prep waxa ay ku dhiirrigelisaa cabasho qabaha in uu marka hore si toos ah uga la hadlo dhibaataada xubinta shaqaalaha ee ku lug leh. Haddii cabasho qabuhu aanu ku qanacsaneyn xalka uu soo jeediyey xubinta shaqaalaha ah ee ku lug leh, haddii xalkaasi aanu ahayn mid la sameyn karo duruufaha jira awgood ama haddii cabasho qabuhu uu aaminsan yahay in dugsigu jabiyey sharciyada iyo nidaamyada la dabbago, cabasho qabuhu waxa uu dalban karaa kulan uu la yeesho maamulaha. Haddii arrinka aan xal laga gaadhin iyada oo la kaashanayo maamulaha dugsiga muddo wakhti ah oo habboon gudaheed (aan ka badneyn 5 maalin dugsiiyeed kadib gudbinta cabashada), cabasho qabuhu waxa uu codsan karaa xallin ama waxa uu xareyn karaa cabasho rasmi ah isaga oo la xidhiidhaya Madaxa Maamulka Dugsiga. Macluumaadka xidhiidhka ee Madaxa Maamulka dugsiga waxa laga heli karaa dugsiga ama waxa aad ka heli kartaa inaad la xidhiidho managingdirectors@striveprep.org.

Haddii cabashada aan loo xallin si uu ku qanacsan yahay cabasho qabuhu iyada oo

loo marayo hannaankan, isaga ama iyadu waxa uu codsan karaa in Madaxa Fulinta ee STRIVE Prep (ama wakiilkiisa) uu dib u eego isaga oo u gudbinaya codsi qoraal ah info@striveprep.org. Haddii cabashadan uu xallin waayo CEO gu, cabasho qabuhu waxa uu u gudbin karaa codsi qoraal ah guddiga dib u eegista cabashada.

Mamnuucidda Takoorka iyo Dhibaateynta

Dhammaan ardayda iyo shaqaalaha STRIVE Prep waxa ay xaq u leeyihiin inay dareemaan ammaan iyo ixtiraam. Si waafaqsan sharciyada xuquuqda madaniga ah ee federaalka (Title VI, Title IX, Xeerka Dadka Maraykanka ah ee Naafada ah, Qaybta 504, iyo Xeerka Takoorka Da'da), sharciga gobolka, iyo sharciyada STRIVE Prep **STRIVE Prep ma sameeyso takoor ku saleysan midab, isir, jinsi, jihada galmada, aqoonsiga ama cabiridda jinsiga, xaaladda beddelka jinsiyeed, diin, asal qaran, abtirsiino, da', xaaladda guurka, xaaladda ciidanka, naafanimada, ama xaalad kasta oo kale oo uu ilaaliyey sharciga deegaanka, gobolka ama federaalka, ee ogolaanshaha, helitaanka, ama la dhaqanka barnaamijyadeeda waxbarashada ama hawlaha ama shaqaaleysiinta.** Dhibaateyntu waa qaab kamid ah takoorka mamnuuca ah. STRIVE Prep waxa ay mamnuucdaa aargoosashada ka dhanka ah qof kasta cabasho daacad ah ama ka qaybqaadasho daacad ah baadhis la xidhiidha takoor ama dhibaateyn awgeed. Dhammaan noocyada takoorka iyo dhibaateynta, oo ay ka mid tahay dhibaateynta galmeed, looma dulqaadan doono.

Takoorka iyo dhibaateyntu boos kuma laha dugsiyada, xarumaha dugsiyada, goobaha xafiisyada STRIVE Prep, ama goobaha kale ee xidhiidhka la leh STRIVE Prep. Takoorka iyo dhibaateynta ay sameeyaan shaqaalaha, ardayda, iyo xubnaha bulshadu looma dulqaadan doono.

Haddii aad tahay arday, waalid/masuul, xubin bulsheed, ama shaqaale u baahan in uu sheego walaac ah dhibaateyn ama takoor, oo uu ku jiro Title IX, fadlan la xidhiidh hoggaamiyaha dugsiyeed ee dugsiya (ama Xafiiska Dhexe ee STRIVE Prep) uu habdhaqanku ka dhacay ama la xidhiidh Isuduwaha Title IX ee STRIVE Prep ama la xidhiidh reportdiscrimination@striveprep.org, si aad u gudbiso warbixin. Wixii dhacdooyin ah ee la xidhiidha shaqaalaha STRIVE Prep oo keliya, waxa aad sidoo kale la xidhiidhi kartaa Taageerada Khayraadka Aadanaha adiga oo kala xidhiidhaya iimeylka hrsupport@striveprep.org.

STRIVE Prep waxa ay isla markaba baadhis ku sameyn doontaa dhammaan walaacyada iyo warbixinada la xidhiidha dhibaateynta. Si aad wax dheeraad ah uga ogaato sharciyada dhibaateyn la'aanta iyo takoor la'aanta iyo hannaanka xallinta ee STRIVE Prep, fadlan booqo www.striveprep.org/resources. Nuqullo dhamaystiran oo ah sharciyada dhibaateyn la'aanta iyo takoor la'aanta iyo hannaanada xallinta ee STRIVE Prep ayaa sidoo kale laga heli karaa xarun iyo Xafiis Dhexe oo kasta.

Title IX

Isuduwaha Title IX ee STRIVE Prep waxa laga la xidhiidhi karaa barta reportdiscrimination@striveprep.org, taleefan ahaana waxa laga la xidhiidhi karaa: 720.772.4300 ama boosta ah STRIVE Prep - Central Office 2480 W. 26th Ave., Suite B-360 Denver, CO 80211. Maamulaha xarun kasta ayaa ah masuulka xidhiidhka Title IX. Warbixinada waxa toos loogu hagaajin karaa masuulka xidhiidhka ama isuduwaha. Si aad u hesho macluumaad dheeraad ah oo ku saabsan sharciyada iyo habraacyada Title IX, fadlan booqo www.striveprep.org/resources.

Ogaysiinta Xuquuqda hoos timaadda FERPA

Xeerka Xuquuqda iyo Qarsoodinimada Waxbarasheed ee Qoyska (FERPA) waa sharci qarsoodinimo oo federaal ah kaas oo siiya waalidiinta/masuullada (iyo ardayda u qalma) ilaalino gaar ah oo la xidhiidha diiwaanada waxbarasheed ee carruurtooda. Si loo ilaaliyo qarsoodinimada ilmahaaga, sharcigu waxa uu guud ahaan ku waajabinayaa dugsiyada in ay dalbadaan ogolaansho qoraal ah kahor inta aanay tusin shakhsi aan ahayn adiga macluumaadka shakhsiga leh la aqoonsan karo ee ilmahaaga. Ka waalid/masuul (ama arday u qalma) ahaan, waxa aad sidoo kale leedahay xuquuq cayiman oo la xidhiidha diiwaanada waxbarasheed ee ilmahaaga.

Si aad wax dheeraad ah uga ogaato FERPA, Diiwaanada Waxbarasheed, xuquuqda waalidka/masuulka ee waafaqsan FERPA, Macluumaadka Hagidda, waxa STRIVE Prep ay u qoondaysay in uu noqdo Macluumaad Hagid, iyo sida aad u adeegsan karto xuquuqdaada ka bixitaanka Macluumaadka Hagidda, fadlan booqo www.striveprep.org/resources. Waalidiinta/masuullada ayaa sidoo kale lagu siiyaa macluumaadka FERPA diiwaangelinta.

Waajibaadka Dugsiga-Qoyska ee Sanad Dugsiyeedka 2022-23

Loogu Talagalay Waalidiinta & Masuullada:

- Waxa waajib igu ah taageeridda barnaamijka waxbarasheed ee adag ee STRIVE Prep iyo heerarka sare ee habdhaqanka.
- Waxa waajib igu ah hubinta in ilmahaygu uu tago dugsiga wakhtiga loogu talagalay, isaga oo xidhan dharka dirayska ah, maalin kasta, iyada oo ay jirto maqnaansho cudur daar leh mooyee, markaas oo aan wici doono dugsiga kahor 9 subaxnimo maalin kasta oo ilmahaygu maqnaan doono ama uu habsaami doono.
- Waxa waajib igu ah inaan ula socdo shaqada dugsi, shaqada guri, iyo heerarka ilmahayga si joogto ah. Badanaaba waxa aan ku dhiirrigelin doona inay dedaalaan oo ay qabtaan shaqada ugu wanaagsan ee suuragalka ah.
- Waxa waajib igu ah siinta deegaan ilmahayga kaas oo ilmahaygu ku qabsan karo shaqadiisa guri, oo leh miis nadiif ah iyo agabka daruuriga ah.
- Waxa waajib igu ah inaan waco STRIVE Prep haddii aan wax su'aalo ah ama walaacyo ah ka qabo horumarka waxbarasheed ama waxbarashada bulsho-dareen ee ilmahayga iyo inaan soo xaadiro munaasabadaha waalidka/masuulka ee waajibka ah sanadka oo dhan.

Loogu Talagalay Ardayda:

- Waxa waajib igu ah in aan xaadiro dugsiga wakhtiga loogu talagalay, aniga oo xidhan dirayska (iyada oo si kale la ii sheego mooyee), maalin kasta.
- Waxa aan fahansanahay Aaminaadaha Muhiimka ah ee STRIVE Prep waxaana waajib igu ah inaan badanaaba sameeyo dedaalkayga ugu wanaagsan si aan u raaco.
- Waxa waajib igu ah inaan ixtiraamkayga, dareenkayga, iyo dedaalkayga oo dhan siiyo hawl walba.
- Waxa waajib igu ah inaan shaqadayda guri kasoo shaqeeyo habeen walba, aniga oo si dhiibsan u keenaya dugsiga, oo soo dhiibaya wakhtiga munaasabka ah.
- Waxa waajib igu ah inaan si joogto ah oo daacad ah uga la hadlo waalidiintayda iyo masuulladayda horumarkayga dugsiga, dhibcahayga, laylisyadayda, iyo habdhaqankayga.

Taas waxa dheer, macallimiinta iyo shaqaaluhu waajibaadkan bay u qabanayaan ardayda iyo qoysaska:

- Waxa waajib igu ah inaan u fuliyo dhammaan waajibaadkayga shaqo si heersare ah oo aan joogo halka ay tahay inaan joogo, xilliga ay tahay inaan joogo halkaas.
- Waxa waajib igu ah inaan si buuxda diyaar ugu ahaado xiisad kasta oo aan dhigayo.
- Waxa waajib igu ah inaan dhibco iyo ra'yi-celin ka siiyo ardayda qiimeynada heerarka ku salaysan iyo caadooyinka waxbarasho aniga oo siinaya wakhti munaasab ku ah sida ku cad sharciga dhibco siinta STRIVE Prep.
- Waxa waajib igu ah inaan u fuliyo dhammaan xeerarka iyo sharciyada si joogto ah oo daacad ah.

- Waxa waajib igu ah inaan la xidhiidho waalidiinta/masuullada ardaydayda ugu yaraan afartii toddobaadba hal mar, oo aan la xidhiidho waalidiinta/masuullada ardaydayda wakhtiyo macquul ah si aan ugu gudbiyo ra'yi-celinta togan iyo ta taban labadaba.
- Waxa waajib igu ah joogteynta heerarka ugu sarreeya ee waxqabadka waxbarasheed iyo habdhaqanka habboon.
- Waxa waajib igu ah inaan ardaydayda u arko si shakhsi-shakhsi ah oo aanay marnaba iga lumin aragtida awoodooda dhabta ah.

Saxeexa Waalidka/Masuulka _____ Taariikhda _____

Saxeexa Ardayga _____ Taariikhda _____

Heshiiska Adeegsiga Masuuliyadda Leh ee Tiknoolajiyadda

Adeegsiga Masuuliyadda Leh

Dhammaan xeerarka STRIVE Prep iyo sharciyada habdhaqanku waa ay khuseeyaan adeegsiga aaladaha iyo internet ka dugsigu bixiyo, oo ay ka mid yihiin balse aan ku xadidneyn, gardarreysiga, takoorka iyo dhibaataaynta iyo sharciyada habdhaqanka. Ardayda jebisa xeerarka ama sharciyada dugsiga iyaga oo adeegsanaya aaladahooga dugsigu bixiyey ama internetka STRIVE Prep waxa ay la kulmi doonaan tallaabo anshax-marin. Adeegsiga nooc kasta oo kamid ah tiknoolajiyadda STRIVE Prep waa uu khusayn karaa ardayda iyo waalidiinta/masuullada saxeexa heshiiskan.

Ardayda iyo waalidiintu/masuulladu waa ay fahansan yihiin in dhammaan xogta la dhex mariyey, oo ay ku jirto ta iimeylka la dhex mariyey, aaladda ay bixisay STRIVE Prep ama loo adeegsaday adeegga internetka STRIVE Prep, in la kormeeri karo oo/ama uu galaangal u heli karo maamulka dugsigu.

Iyaga oo kaashanaya waalidiinta/masuullada, STRIVE Prep waxa ay ardayda bartaa wax ku saabsan adeegsiga tiknoolajiyadda iyo internetka ee habboon. STRIVE Prep waxa ay ku hallaysaa waalidiinta/masuullada inay sidoo kale kala hadlaan ilmahooga adeegsiga tiknoolajiyadda iyo internetka ee habboon. Haddii aad jeclaan lahayd in kaalmo lagaa siiyo sida aad uga la hadli lahayd adeegsiga habboon ilmahaaga, fadlan ka dalbo mamulaha dugsigaaga khayraad.

U Hoggaansanka CIPA

STRIVE Prep waxa ay u hoggaansan tahay Xeerka Ilaalinta Internetka Carruurta ee uu waajibiyey federaalku (CIPA) iyada oo loo marayo kormeeridda, shaandhaynta, iyo xanibaadda waxa ku jira internetka ee loo arko mid dhibaato leh ama aan munaasab ku ahayn carruurta. Sharcigan shaandhaynta waxa waajibiyey sharciga. Nuqul ah Sharciga Shaandhaynta Waxa Internetka Ku Jira oo faahfaahsan ayaa la heli karaa marka la codsado.

Shaandhada waxa internetka ku jira ee STRIVE Prep sidoo kale waxa ay kormeertaa dhaqdhaqaaqa la xidhiidha ammaanka iyo is-waxyellaynta oo gaar ah (iyada oo la adeegsanayo erayo ama baadhitaano fure ah) waxaana uu baraarujino siiyaa masuullada xarunta ee u xilsaaran. Kormeeridda iyo baraarujinada keliya waxa la sameeyaa inta lagu gudo jiro saacadaha dugsiga. Iyada oo ku xidhan sababta baraarujinta, baraarujinta waxa loo diri karaa bilayska maxalliga ah ama maamulada kale ee habboon. Iyada oo loo ogolaanayo ilmahooga in uu galo tiknoolajiyadda STRIVE Prep iyo aaladaha uu bixiyo dugsigu, waalidiinta/masuullada waxa ay ogolaanayaan in nidaamkan kormeeridda iyo baraarujinta aanu abuurin qaybta STRIVE Prep masuuliyad kaga timaadda dhaqdhaqaaqyada onlaynka ee ardayda ama habdhaqanka la xidhiidha dhaqdhaqaaqyadaas. STRIVE Prep waxa ay beddeli kartaa nidaamkeeda kormeerka iyo baraarujinta wakhti kasta, si waafaqsan sharciga gobolka iyo federaalka. Waalidiinta/masuullada kuwaas oo qaba su'aalo ku saabsan nidaamka kormeerka iyo baraarujinta waa inay la hadlaan maamulaha ilmahooga.

Waxyellada/Masuuliyadda

Adeegsabayaasha ardayda ah iyo qoysaskooga ayaa masuul ka ah saamaynaha dhaqaale ee hantida waxyellowda, la waayo ama la xado, illaa iyo oo ay ku jirto kharashka beddelka (illaa iyo \$250 Chromebook giiba) iyada oo la raacayo go'aan gaadhista dugsiga. Haddii aaladda dugsigu bixiyo ee ilmahaagu ay waxyellawdo, hallawdo ama la xado, waa inaad si dhakhso ah u ogaysiiso maamulaha dugsigaaga.

Xadgudubyada

STRIVE Prep waxa ay xaq u leedahay inay diiddo, ka noqoto ama ay hakiso mudnaano adeegsade oo cayiman oo/ama ay qaaddo tallaabo anshax-marin oo kale, oo gaadhsiisan oo ay ku jirto ka joojin dugsiga oo ku meelgaadh ah ama eryid jabinta sharcigan awgii ah. Dugsigu waxa uu u sheegi doonaa hay'adaha fulinta sharciga ee munaasabka ah dhaqdhaqaaqa sharci darrada ah ee lagu dhex sameeyo adeegga internetka ee STRIVE Prep. Dugsigu waxa uu sidoo kale si buuxda ugala shaqayn doonaa saraakiisha deegaanka, gobolka, iyo/ama federaalka baadhitaanka la xidhiidha dhaqdhaqaaqyada sharci darrada ah ee lagu dhex sameeyo adeegga.

Marka aan saxeexo halka hoose, waxa aan qirayaa in aan akhriyey, fahmay oo aan ogolaaday shuruudaha ku xusan halka sare. Waxa aan fahansanahay in ilmahaagu aan loo ogolaan doonin in uu galaangal u helo tiknoolajiyadda ama adeegga internetka ee STRIVE Prep illaa ilmahaagu iyo aniga labadayaduba aanu saxeexno heshiiskan.

Saxeexa Waalidka/Masuulka _____ Taariikhda _____

Saxeexa Ardayga _____ Taariikhda _____

Warqadda Qorshaynta Ka Hortagga Isdilka

Waaladka ama Masuulka Qaaliga ah,

STRIVE Prep waxa ka go'an ammaanka iyo badqabka ilmahaaga, taasna waxa kamid ah caafimaadka maskaxda. Bulshadeena, caafimaadka maskaxda loogama hadlo si furan sida looga hadlo caafimaadka jidhka. Dareenada niyad jabka badanaaba waa la qariyaa waayo dhallinyartu waa ay khalad fahansan yihiin, ka khajilaan yihiin, ama ceeb bay u arkaan, qarintanina waxa ay yeelan kartaa cawaaqib daran.

Colorado, isdilku waa sababta ugu horaysa ee dhimashada ee 10 illaa 24-sano-jirrada; si walba ha noqotee, **isdilku waa wax laga hortagi karo**. Dhallinyarta badanaaba ku fekeraya inay is dilaan calaamado digniin ah oo soo noqnoqda baa ay bixiyaan oo tilmaamaya culayska ay dareemayaan. Waalidiinta/Masuullada, macallimiinta, iyo saaxiibadu waxa ay ku jiraan boos muhiim ah oo ay tahay inay ku fahmaan calaamadahan oo ay ku taageeraan inay caawimo helaan. Waxa muhiim ah inaan marnaba la dhayalsan calaamadahan digniinta ama aan ballan lagu qaadin in la qariyo.

Astaamaha Digniinta: U Fiirso oo Dhegayso

Calaamad digniin ahi waa caddeyn in qof laga yaabo in uu ku fekerayo in uu isdilo. Dadka badankoogu waxa ay bixiyaan cadaymo ama ishaarooyin sheegaya waxa ay damacsan yihiin. Waalidiintu badanaaba waa in wixii ishaarooyin isdil ah ama calaamado isdil ah aanay fudaydsan. Haddii aad aragto/maqasho calaamad digniin, caawimo degdeg ah raadi.

- Dhegayso hadal ku saabsan isdil, u muuqashada bilaa rejo, cabiridda xanuun, ama u muuqashada qof culaysku ka batay.
 - “Waxa aan jeclaan lahaa inaan dhiman lahaa” iyo “Ma joogi doono si aan tan ula tacaalo wakhti intan ka badan”
- U fiirso isbeddelada waaweyn, sida:
 - Farqiyo waaweyn oo muuqaalka ama muudhka ah (sida, werwerka) ama shucuurta (sida, cadhada)
 - Gaabsiga xad dhaafka ah
 - Hurdo korodha ama yaraata
 - Korodhka habdhaqan khatar ah (oo uu kamid yahay adeegsiga khamriga/daroogada)
 - Xiisaha shayada ay mar jeclaan jireen oo yaraada

Waxa ay Tahay in La Sameeyo:

Halkan waxa ah waxa ay tahay inaad samayso haddii ilme uu muujiyo calaamado isdil:

1. Weydii inay fiican yihiin. Ahaw mid deggan. U dhegayso walaacyada

ilmahaaga si firfircoon adiga oo aan si kale u eegeynin. La wadaag walaacyadaada. Diiradda saar inaad danaynayso badqadkiisa iyo ammaankiisa.

2. **U weydii** ilmaha si toos ah oo deggan in isagu ama iyadu uu ka fekerayo isdil (sida, “Ma waxa aad ka fekeraysaa isdil?” “Ma waxa aad doonaysaa inaad dhibaataayso ama aad disho naftaada?”)
3. Xusuusi dhibaatooyinka noloshu inay u muuqan karaan kuwo xad dhaaf ah, balse aad ka wada shaqayn doontaan inaad waxoogaa ka yarayso haddii mar uun ay dhibaatoodaan. Waxa jira qaabab ammaan ah oo caafimaad qaba oo loola tacaalo caqabadaha noloshu. U sheeg inaad jeceshahay oo aad garab taagan tahay.
4. Bar ilmahaaga in uu u **sheego** qof weyn oo uu ku kalsoon yahay haddii isaga ama arday kale uu muujiyo calaamado isdil. Kuma qasbana inay la tacaalaan mushkiladda keligood. Caawimo ayaa badanaa la heli karaa. Cid kasta oo ay u tagaan oo ah macallin, xubin qoys, hoggaamiye diimeed, ama bixiye daryeel caafimaad maskaxeed, inay kala hadlaan qof waxa ay marayaan waxa ay ka caawin kartaa inay soo rayn dareemaan oo ay helaan qaabab cusub oo ay kula tacaalaan.
5. **Raadso caawimaad:** U raadi caawimo xirfadeed. Iska caabbi doonista ah in aad tan guriga ku xalliso. Xusuuso in marka carruurteenu dhibaatoonayaan, inay u baahan karaan taageero dhaafsan waxa aynu bixin karno. Inaad la xidhiidho caawimo xirfadeed ayaa ah hal qaab oo aad ilmahaaga ugu muujinayso inaad jeceshahay. Adiga, ka waalid ahaan, waa inaad ku tiirsanaato khubarada; keli kuma tihid tan. Haddii ilmahaagu uu ku jiro khatar degdeg ah, ha kaga tegin keli; wac laynka xaaladda degdegga ah ee dhibaatooyinka.
 - Wac **Adeegyada Dhibaatooyinka Colorado**, 1.844.493.TALK (8255), oo ah layn taageero oo 24/7/365 ah oo loogu talagalay qof kasta oo ay saamayso dhibaato ammaan ama shucuureed. Dhammaan wicitaanadu waxa ay ku xidhiidhsan yihiin khabiir caafimaadka maskaxda ah kaas oo bixiya taageero qarsoodi ah oo degdeg ah iyo xidhiidho khayraad oo kale. Taas waxa dheer, waxa aad si fool ka fool ah taageero uga heli kartaa xarunta ballan la'aanta lagu tago ee dhibaatooyinka ee kuugu dhaw ama waxa aad taageero ku heli kartaa wadasheekaysi qoraal ah adiga oo u qoraya "talk" 38255.
 - Haddii aad si degdeg ah uga walaacsan tahay ammaanka ilme, balse aanad hubin cidda ay tahay inaad wacdo, waxa aad si aan haybtaada la aqoonsaneyn ugu sheegi kartaa **Safe2Tell** adiga oo ka wacaya 1.877.542.7233 ama adiga oo booqanaya Safe2Tell.org, ama adiga oo ka adeegsanaya app ka Safe2Tell aalad moobil. Warbixinta waxa loo diri doonaa kooxo maxalli ah kuwaas oo wax ka qaban kara, sida masuullada dugsigu, khubarada caafimaadka maskaxda, iyo bilayska.
 - Wac 9-8-8.

Waa khuraafaad in *dadka cabbira samaysanka fikradda isdilka ama isku daya inay isdilaan balse aan ku dhiman isdil ay keliya isku dayayaan inay dareen ku kasbadaan run ahaana aanay ka dhab ahayn*. Samaysanka fikradda ama isku daya isdilka, xattaa haddii qofku dhexda ka noqdo, waxa ay ka dhigan tahay in qofku wajahayo xanuun aad u badan. Wixii ah samaysan fikrad ama isku daya, iyada oo aan la eegayn darnaanteed, waa calaamad culays waana inaan la fudaydsan: **dhegayso oo caawimo raadso**.

STRIVE Prep, waxa aanu tababarnay khabaro iyo masuullo caafimaadka maskaxda ah oo ku salaysan dugsiga kuwaas oo khayraad u noqon kara ardayda ay dhici karto inay ka fekerayaan isdil ama garanaya qof ku fekeraya. Fadlan la xidhiidh dugsiga ilmahaaga si laguugu xidho xubin shaqaale oo tababaran. Halkan adiga ayaanu kuu joognaa.

Bayaanka Fahanka Buug-yaraha Ardayga & Qoyska

Waxa aan qirayaa in aan helay nuqul ah Buug-yaraha Ardayga & Qoyska ee Dugsiga Dhexe ee STRIVE Prep ee sanad dugsiyeedka 2022-23. Marka aan saxeexo halka hoose ilmahayga iyo anigu waxa aanu fahansanahay in ay masuuliyadayada tahay in aanu barano mawduucyada buug-yaraha iyo in ardaygayga iyo anigu aanu ogolaanay inaanu u hoggaansano sharciyada iyo habraacyada ku jira buug-yaraha. Intaas waxa dheer, waxa aan fahmay oo aad ogolaaday in marka aan ka diiwaangeliyo ilmahayga STRIVE Prep in dhammaan macluumaadka diiwaangelinta iyo idmidda, ogolaanshaha iyo fasixidda waalidka/masuulka ee lagu dhamaystiray diiwaangelinta onlaynka ah ee DPS inay gaadhsiisan yihiin STRIVE Prep. Waxa aanu fahansanay in haddii aanu qabno su'aalo ku saabsan buug-yaraha ama wax kamid ah sharciga STRIVE Prep, in aanu la hadli doono maamulaha dugsiga.

Magaca Ardayga

Magaca Waalidka/Masuulka

Saxeexa Ardayga

Saxeexa Waalidka/Masuulka

Taariikhda

Taariikhda